

吳郡圖經續記序

方志之學先儒所重故朱贛風俗之條顧野王輿地之記  
賈耽十道之錄稱於前史蓋聖賢不出戶知天下矧居是  
邦而可憫于古今哉按唐六典職方氏掌天下之地圖凡  
地圖命郡府三年一造與版籍皆上省 聖朝因之有閏  
年之制蓋城邑有遷改政事有損益戶口有登降不可以  
不察也吳為古郡其圖志相傳固久自大中祥符中 詔  
修圖經每州命官編輯而上其詳畧蓋係乎其人而諸公  
刊修者立類例據所錄而刪撮之也夫舉天下之經而修  
之其文不得不簡故陳迹異聞難於具載由祥符至今



逾七十年矣其間近事未有紀述也元豐初朝請大夫臨  
淄晏公出守是邦公乃故相國元獻公之子好古博學世  
濟其美嘗頌敝廬語長文曰吳中遺事與古今文章湮落  
不收今敬綴緝而吾所善練定以謂惟子能為之也長文  
自念屏跡陋巷未嘗出庭戶於求訪為艱而練君道晏公  
意屢見趣勉於是叅考載籍探撫舊聞作圖經續記三卷  
凡圖經已備者不錄素所未知則闕如也會晏公罷郡乃  
藏于家今太守朝議大夫武寧章公治齊三年以政最被  
命再任此因臨長文所居謂曰聞子嘗為圖經續記矣予  
願觀焉於是稍加潤飾繕寫以獻寘諸郡府用俾諮閱固

可以質凝滯根利病資議論不為虛語也方 聖上睿謨  
神烈聲教光被海隅出日罔不率俾廣地開境增為郡縣  
倘或 申命方州更定圖籍則此書庶幾有取也事有缺  
略猶當刊補其古今文章別為吳門摠集云  
元豐七年九月十五日州民前許州司戶叅軍朱長文上

吳郡圖經續記卷上

封域 城邑 戶口 坊市 物產 風俗

門名 學校 州宅 南園 倉務 海道

亭館 牧守 人物

封域



蘇州在禹貢為揚州之城書云三江既入震澤底定即此地也至周為吳國始泰伯與其弟仲雍皆太王之子王季歷之兄也泰伯以天下遜其弟王季乃與仲雍南奔以避之即其所居自號句吳吳民義而從之者千餘家當商之末世築城郭以自衛遂為吳泰伯春秋傳曰泰伯端委以

治周祀仲雍嗣之自泰伯作吳五世而武王克商求泰伯  
仲雍之後得周章周章已君吳因而封之其爵為伯國語  
云命圭有命固曰吳伯不曰吳王自周章傳十四世吳子  
壽夢立吳益大稱王而春秋書之曰子魯成公七年春吳  
伐剡秋吳入州來是時楚一歲七奔命蠻夷屬於楚者吳  
盡取之始通於上國矣又更四君至吳王闔廬吳自泰伯  
以來所都謂之吳城在梅里平墟乃今無錫縣境及闔廬  
立乃徙都即今之州城是也於是西破楚入郢北威齊晉  
蓋當是時吳與越以浙江分境越患猶遠吳越春秋云句  
踐五年入臣於吳郡臣祖道至浙江上蓋浙為吳境也句

踐七年既釋囚返國厚獻吳王夫差夫差悅之於是賜書  
增之以封東至句甬西至檣李南至姑末北至平原縱橫  
八百餘里子胥諫之不聽事具吳越春秋吳之南境益狹矣句踐

終敗吳而圍之魯哀公二十二年越滅吳吳迺為越而越  
王未聞居吳也句踐後更六王至無疆更一百四十餘年  
為楚威王所滅取吳故地威王曾孫曰考烈王春申君黃  
歇為之相乃以吳封春申使其子為假君留吳及秦併其  
地置會稽郡漢順帝永建四年分會稽為吳郡以浙江中  
流為界晉宋齊梁陳之間雖頗割地而郡不改與吳吳丹  
陽號為三吳隋平陳割鹽官以隸于坑至唐有吳長洲嘉

興崑山常熟海鹽華亭七邑號為雄郡乾元二年嘗置長  
洲軍大曆中廢五代時分嘉興海鹽華亭別為秀州隸蘇  
者唯五縣錢氏獻其籍

國朝以為平江郡度所領縣仍故謂之望郡云

### 城邑

昔闔廬問于子胥曰吾國在東南僻遠之地險阻濶濕有  
江海之害內無守禦外無所依倉庫不設田疇不墾為之  
奈何于是子胥說以立城郭設守備實倉廩治兵庫一作  
闔廬乃委計于子胥使之相土嘗水象天法地築大城周  
四十里小城周十里開八門以象八風是時周恭王之六

年也自吳亡至今僅二千載更歷秦漢隋唐之間其城城  
門名循而不變陸機詩云閭門何峨峨飛閣跨通波其物  
象猶存焉隋開皇九年平陳之後江左遭亂十一年楊素  
帥師平之以蘇城嘗被圍非設險之地秦徒于古城西南  
橫山之東黃山之下唐武德末復其舊蓋知地勢之不可  
迂也觀于城中衆流貫州吐吸震澤小濱別派旁夾路衢  
蓋不如是無以泄積潦安民也故雖名澤國而城中未嘗  
有墊溺蕩析之患非智者創于前能者踵于後安能致此  
哉而流俗或傳吳之故都在館娃宮側非也蓋娃宮胥臺  
乃離宮別館耳當吳之盛時高自矜侈籠西山以為圍度

五湖以為池不足克其欲也故傳闔廬秋冬治城中春夏  
治城外旦食鮪山晝遊蘇臺射于鷗陂馳于遊臺興樂石  
城走犬長洲其耽樂之所多矣左氏傳載楚子西之言曰  
夫差次有臺榭陂池為宿有嬪妃嬙御為一日之行所欲  
必成今故老猶能道其遺跡信不虛也自唐季盜起浙西  
帥周寶以楊茂實為刺史為盜所據龍紀元年錢鏐遣其  
弟鉞破徐約于此州以都將沈粲榘領其後李宥一作孫  
儒揚行密時臺濛三陷郡城乾寧五年鏐既平董昌遣其  
將頌全武自會稽航海道帥師擊之臺濛遁去蓋於此十  
餘年間民困于兵火焚掠赤地唐世遺跡殆盡錢氏有吳

越稍免干戈之患自乾寧至于太平兵燹三年錢俶納土  
凡七十八年自錢俶納土至于今元豐七年百有七年矣  
當此百年之間井邑之富過于唐世郭郭填溢樓閣相望  
飛杠如虹櫺比棋布近郊隘巷悉甃以甃冠蓋之多人物  
之盛為東南冠實太平盛事也

### 戶口

西漢之會稽郡舉今二浙之地皆在焉其為戶二十二萬  
三千三十八東漢之吳郡舉今浙西之地皆在焉其為戶  
十六萬四千一百六十四晉之吳郡舉今杭秀睦三州之  
境皆在焉其為戶二萬五千唐之蘇州舉今秀州之地在

為初其為戶一萬一千八百五十九天寶之盛至七萬六千四百二十一自錢武肅分蘇以為秀州用是屏蔽其隸蘇者吳長洲崑山常熟又分吳縣為吳江合五邑而已忠懿王以其國歸之有司

國朝與民休息稼穡豐植大中祥符四年有戶六萬六千一百三十九由祥符至於今七十餘年間累聖丕承仁澤日厚龐鴻汪洋何生不育元豐三年有戶一十九萬九千八百九十二有了三十七萬九千四百八十七嗚呼盛矣蓋以州在漢迺一縣之境比唐為半郡之餘而其民倍徙於當時不可勝數蓋自昔未有今日之盛也故其輸帛為

疋者八萬輸纊為兩者二萬五千輸苗為斛者三十四萬

九千苗有蠲放者在此數中輸錢免役為緡者八萬五千皆有疇疇數

殘田也焉而又有鹽稅權酤之利為多以一郡觀之則天下

蓋可知矣昔冉有曰既庶矣又何加焉孔子曰富之既富

矣又何加焉曰教之苟有用我者期月而已三年有成况

今承百年太平之後而有四海全盛之勢哉方聖上精

一以迪德幾微以成務講政修教朝出於軒陛暮行於海

宇六府三事既允治矣方當鄭之以禮和之以樂躋民於堯

舜三代之隆此其時哉

圖經坊市之名各三十蓋傳之遠矣如曳鍊坊者或傳孔子登泰山東望吳閭門嘆曰吳門有白馬如鍊因是立名黃鸝市之名見白公詩所謂黃鸝巷口鶯欲語烏鵲橋頭冰未銷是也其餘皆有義訓不能悉知其由其巷名見於載籍者如彈鋏渴烏一二種皆莫知其處乃知事物不著于文字之間則艱于傳遠故方志之說不可廢也近者坊市之名多失標榜民不復稱或有因事以立名者如靈芝坊因樞密直學士蔣公堂身冠坊因侍御史范公師道德慶坊因今太子賓客盧公華各以其所居得名蓋古者以德名鄉之義也苟擇其舊號益以新稱分其邑里因以彰

善旌泚不亦美哉昔梅福棄官易名姓為吳市門卒今此有西市門殆其所隱乎

### 物產

吳中地沃而物夥其原隰之所育湖海之所出不可得而殫名也其稼則刈麥種禾一歲再熟稻有早晚其名品甚繁農民隨其力之所及擇其土之所宜以次種焉惟籟箭子者為最歲供京師其果則黃柑香碩郡以充貢橘分丹綠梨重絲蒂函列羅生何珍不有其州則藥品之所錄離騷之所詠布護于皋澤之間海苔可食山蕨可掇幽蘭國香近出山谷人多玩焉其竹則大如篔簹小如箭桂含露



而班冒霜而紫修篁叢荀森萃蕭瑟高可拂雲清能來風  
其木則栝栢松梓椶楠杉桂冬巖常青高林相望栳栳  
實蕃衍足用其花則木蘭辛夷著名惟舊牡丹多品遊人  
是觀繁麗貴重盛亞京洛朱華凌雪白蓮敷治文通樂天  
昔嘗稱詠重臺之蕙蓄傷荷之珍藕見於傳記其羽族則  
水有賓鴻陸有巢翠鷓鴣鷺鷥鵲鷓鴣之類巨細參差  
無不咸脩華亭仙禽其相如任或鳴高原或擾樊籠其鱗  
介則鱖鱣鯉鯪鮓鱒鯊乘鱉鼉蟹螯螺蛤之類恠詭  
舛錯隨時而有秋風起則鱸魚肥棟木華而石首至豈勝  
言哉海瀕之民以網罟蒲羸之利而自業者比於農圃焉

又若太湖之怪石包山之珍茗千里之紫菀織席最良給  
用四方皆其所產也若夫舟杭往來北自京國南達海徼  
衣冠之所萃聚食貨之所叢集乃江外之一都會也

### 風俗

秦伯遜天下李札薛一國德之所化遠矣更歷西漢習俗  
清美昔吳太守糜豹出行屬城問功曹唐景風俗所尚景  
曰處家無不孝之子立朝無不忠之臣文稱儒宗武為將  
帥時人以為善言陸機詩云山澤多藏育土風清且嘉秦  
伯導仁風仲雍揚其波豈不然哉蓋朱買臣陸機顧野王  
之徒顯名於歷代而人尚文支遁道生慧響之傳唱法于

羣山而人尚佛故吳人多傳學喜信施蓋有所由來也然  
誇豪好侈自昔有之吳都賦云競其區宇則并疆兼卷矜  
其晏居則珠服玉饌亦非虛語也自  
本朝承平民被德澤垂髻之兒皆知翰墨戴白之老不識  
戈矛所利必興所害必去原田腴沃常獲豐穰澤地沮洳  
寢以耕稼境無劇盜里無奸兇可謂天下之樂土也頌其  
民崇棟宇豐庖厨嫁娶喪葬奢厚逾度捐財無益之地廢  
產不急之務者為多惟在位長民者有以化之耳

門名

吳王闔廬建城之始立陸門八以象八風水門八以象八

卦吳都賦云郭郭周市重城結隅通門二八水道陸衢劉  
夢得詩云二八城門開道路五千兵馬引旌旗其傳久矣  
或謂八門者其南曰盤門以嘗刻蟠龍之狀或曰水陸相  
半沿洄屈曲故謂之盤也曰蛇門者為其於十二位在巳  
也又云以越在巳地為木蛇北向示越屬吳也其西曰闔  
門者象天門之有閭闔也曰胥門者子胥居其旁民以稱  
焉夫差伐齊之役胥門巢將上軍蓋當時以巢所居為號  
也門外有其東曰婁門者婁縣名也蓋因其所道也秦謂  
之膠音漢謂之婁今之崑山其地一也曰葑作門者取葑  
禺之山以為名封山故屬吳郡今在吳興方言謂封曰葑

葑者茨上穆結可以種植者也其事或然曰將門者吳王使干將於此鑄寶劍今謂之匠聲之變也北曰齊門者齊景公女嫁吳世子者登此以望齊也又南曰赤門北有平門蓋不預八數或曰平門者故為巫門巫咸所葬也當吳時不開東面之門欲以絕越其後稍或開塞蓋其多途則艱于守衛幾禁也今所啓者五而已封門陸衢中或堙塞范文正公命闢之為門往來至今大以為便

### 學校

吳郡昔未有學以文請解者不過數人景祐中范文正公以內閣典藩而欲庠序之未立我先君光祿率州人請建

學文正公請于朝奏可乃割南園之一隅以創焉既成或以為太廣范公曰吾恐異時患其隘耳乃置學田命師傳其後為守者繼成其事富郎中嚴又建六經閣自安定先生翼之首居于此而博洽有道之士如王會之逢張舜民芻張公達伯玉之儔繼處其任學者甚衆登科者不絕有若滕正議元發錢翰林醇老諸公稍以出熙寧之際朝廷選置學官更問大義士之未者甚盛矣頃時學校理

又割南園地以廣其垣然黌舍未多今猶以為隘也宣聖殿旁舊有文正公祠以安定先生配歲時釋奠者皆焚香拜首學中有十題曰辛夷百幹黃楊公堂槐楫足松雙桐

石楠籠頭檜蘸水檜泮池玲瓏石或云蘇子美嘗掌學命名也

州完上

郡國志云今太守所居室即春申君之子為假君之殿也  
因數失火塗以雌黃故曰黃堂又傳吳宮至秦時猶存守  
宮吏以火視燕窟遂火焉其遺跡雖無存者其地則未聞  
或改也漢會稽太守治於吳朱買臣載其故妻到太守舍  
置園中給養之即此地也今郡廨承有唐五代之後晉常  
蘇州詩云海上海上風雨至逍遙地閣涼白樂天於西樓命宴  
齊雲樓晚望皆有篇什所謂池閣者蓋今之後池是也西

樓者蓋今之觀風樓也齊雲樓者蓋今之飛雲閣也

白公詩云

欲辭南國去  
重上北城樓

木蘭堂之名亦久矣皮陸唱和詩有木蘭後

池即此也池中有老檜婆婆尚存父老云白公手植已二  
百餘載矣詢之士子云張刑部太初作山陰堂蔣密直治  
後池諸亭及瞰野亭見山閣呂光祿建按武堂蔡秘閣子  
直置射堂裴校理如晦立飛雲閣韓度支子文植恠石二  
於便廳後榜曰介軒近晏大夫處善葺故事於城西北隅  
號曰月臺以便登覽餘則未悉聞也

州完下

蓋古之諸侯有三門外曰臯門中曰應門內曰路門因其

門以為三朝二之後有三寢曰路寢一曰燕寢二自罷侯  
置守其名既殊其制稍削然猶存其槩今之子城門古之  
所謂臯門也今之戟門古之所謂應門也今之便廳門古  
之所謂路門也今之大廳古之外朝也今之宅堂古之路  
寢也蘇為東南大州地望優重府庭有以稱自唐乾寧元  
年刺史成及建大廳更五代至于

聖朝嘉祐間年祀寢遠棟宇既敝紫微王公君玉乃新作  
是廳選材鳩工閎敞甲諸郡陳祠部天常新作子城門樓  
觀甚偉而大廳之前戟門之後廊廡庫陋不稱且甲伏架  
閣二庫在焉海瀕卑濕暑氣蒸潤戎器簿籍或材弊文朽

不可用又高麗人來朝過郡二有燕勞其從者皆坐於廊  
此而不葺非所以葺弊示遠也元豐六年太守朝議大夫  
章公以是說謀於轉運使得羨錢二百萬又以公使助之  
于是易以修廊廡以重屋二樓對立樓各八楹木章必精  
陶埴以良吏無容姦工各獻巧故省費而功速明年春落  
成又修戟門薦之高於舊三尺由是臺門至于府庭棟宇  
相副輪焉奐焉不陋不奢浚無以加也

### 南園

南園之興自廣陵王元璩帥中吳好治林圃於是醴流以  
為沼積土以為山島嶼峯岫出於巧思求致異木名品甚

多比及積歲皆為合抱亭宇臺榭值景而造所謂三閣八  
亭二臺竊首旋螺之類名載圖經蓋舊物也錢氏去國此  
園不毀王黃州詩云他年我若功成後乞取南園作醉鄉  
迺玩而愛之至也或傳祥符中作景靈宮古侯切求珍  
石郡中嘗取於此以貢京師其間樓榭歲久摧圯呂濟公  
嘗作熙二堂厥後守將亦加修飾今所存之亭有流杯四  
照百花樂豐惹雲風月之目每春縱士女遊覽以為樂焉

### 倉務

南倉子城西北倉在閭門側皆前後臨流每歲輸稅於南  
和糶於北以元豐三年計之所糶無慮三十萬斛東南之

計仰給於此而農民賴官糶以平穀價其利博哉稅務旧  
在驛前范文正公遷於西河之上官私舟楫往來輸稅者  
不必迂路至今以為便酒務損弊前守司諫孫公請于  
朝給省金四萬緡新之晏公章公相繼趣成近已畢工又  
嘗大修南倉既閱且固為儲積之利

### 亭館

臨水之亭圖經所載者四今漕渠之上增建者多矣曰按  
部曰緇衣曰濟川曰皇華曰使星曰候春曰襄德曰旌隱  
之類聯比于岸矣所謂襄德者近於秘監富公之居旌德  
者近于密直蔣公之居昔之郡將名亭以襄二老也近歲

高唐人來貢

聖朝方務綏遠又於城中闢懷遠安流二亭及盤閭之外各建大館為賓餞之所

### 海道

吳郡東至于海北至于江傍青龍福山皆海道也漢武帝遣嚴助發兵會嵇浮海救東甌後朱買臣言東越王居保泉山今發兵浮海直指泉山陳舟列兵席捲南行可破滅也上拜朱買臣會稽太守詔買臣到郡治樓舡備糧食水戰具居歲餘買臣受詔將兵與橫海將軍韓說等俱擊破東越晉袁山松虞潭嘗於滄瀆築城壘以防寇自朝家承

平總一海內閩粵之賈乘風航海不以為險故珍貨遠物畢集於吳之市今瀕海皆有巡邏之官所以戢盜賊禁私鬻也

### 牧守

昔漢會稽太守治于吳自朱買臣見遇武帝引章之節世歆其榮光武時有任延者稱為循吏延字長孫年十九為會稽都尉迎官驚其壯及到靜治無為惟先遣饋祀祠延陵季子聘請高行如董子儀嚴子陵等待以師友之禮掾吏貧者輒分俸祿以賑給之省諸卒令耕公田以周窮急所行縣輒使慰勉孝子就飧飯之吳有龍丘萇者隱居太

末志不降辱掾史請召之延曰龍丘先生躬德履義有原  
憲伯夷之節都尉掃洒其門猶惧辱焉名之不可遣功曹  
奉謁修書記致醫藥相望于道積一歲萇乃詣府願得脩  
錄遂命為議曹祭酒是以郡中賢士大夫爭往官焉自晉  
至唐守牧之良者已載圖經矣於新唐史又得數事焉史  
稱王仲舒之為刺史也隄松江為路變屋瓦絕火災賦調  
常與民為期不擾自辦于頔之為刺史也罷淫祠沒溝澮  
端路衢為政有績揚發之為刺史也其治以恭長慈幼為  
先是皆可述者也若韋應物白居易劉禹錫亦可謂循吏  
而世獨知其能詩耳韋公以清德為唐人所重天下號曰

韋蘇州當正元時為郡於此入賴以安又能賓儒士招隱  
獨顧况劉長卿丘丹秦系皎然之儔類見旌引與之訓唱  
其賢于人遠矣樂天高行美才其于簿領宜不以屑意然  
觀其勤瘁非旬休不設宴見於題咏嘗作虎丘路免於病  
涉亦可以障流潦未幾求去夢得贈詩云姑蘇十萬戶皆  
作嬰兒啼蓋其實也楚淢之為州當災役之後民無流徙  
朝廷以其課最賜三品服此三人者至今以為美談自錢  
武肅王吳越以其子元璟為刺史當兵火剽焚之後而元  
璟以儉約慎靜鎮之者三十年與江南李氏接境而能保  
全屏蔽者元璟之功也元璟後封廣陵郡王子文奉嗣之



頗亦好士有勝致平官其後忠懿王納土請吏

朝廷始除守以治之自太平興國三年至今元豐四年更

七十二人矣題名具朝廷以劇郡常慎其選非臺閣之賢

漕憲之序不以輕授其風流文雅開敏疆濟豐功琦行貴

名茂闕列于國史炳于家傳者多矣草野之士獨處而罕

聞雖聞而不詳何以遽數哉今朝議大夫章公嘗將漕二

漕有威名及既下車飭治衆職雖小必察始至會暴風湖

海之瀕民或漂溺公遣吏巡視賑恤請蠲田租人不失所

鋤治奸吏繩遏浮蕩擊沮豪右莫不畏悛政聲流聞詔曰

吏不數易然後得以究其材今夫蘇劇郡也而爾為之守

克有能稱嘉省厥勞仍其舊服往惟率職不懈以稱吾久

任之意哉可令再任蘇守自國朝以來惟公再任邦人美

之時議欲大修郡城增濬運河公務愛民力請罷其役民

甚德之

### 人物

吳中人物尚矣漢嚴助朱買臣會稽吳人以儒學文詞名

當時舉賢良對策者百餘人武帝善助對獨擢助為中大

夫而既貴幸乃薦朱買臣亦為中大夫由是並在左右與

大臣辨論中外相應以義理之文其後相繼為會稽太守

助為會稽數年不聞問天子賜書曰君厭承明之廬勞侍

逆之事懷故土出為郡吏會稽東接于海南近諸越北枕  
大江間者濶焉久不聞問具以春秋對助恐上書謝顛奉  
三年計最買臣懷會稽太守章步歸郡邸長安廐吏乘駟  
馬車來迎會稽太守且至發民除道縣長吏並送迎  
車百餘乘此二人者並起書生遂宰一郡福千里其為榮  
遇可勝哉然助能論指南越遣子入待買臣擊破東越有  
功亦足以稱焉自東漢至于唐代有賢哲已具圖經而四  
姓者最顯陸機所謂八族 足後四姓實名家四姓者朱  
張顧陸也其在江左世多顯人或以相業或以儒術或以  
德義或以文詞已著於舊志矣自廣陵王元璩父子跡中

吳是時有丁陳范謝四人者同在賓幕以長者稱丁氏之  
後有晉公出入將相范氏之後有文正公叅豫大政為世

宗師文正公族姪龍圖公

師道

以直清顯

先朝履歷諫

憲謝氏之後有太子賓客

濤

賓客有子曰

煒

為知制誥縉

紳推之陳氏之後有太子中允之奇者謝隴西郡王宅教  
授以歸召之不起以行義著鄉閭謂之陳君子者也又若  
宣徽使鄭文肅公以謀烈贊樞府定邊陲秘書監富公嚴  
以耆德守鄉邦而許洞以歌詩著名祥符之間皆吳人也  
而東南之才美與四方之遊宦者視此邦之為樂也稍  
卜居營墓而子遂留不去者不可以遽數也今茲宗工名

傳出于吳者高則登黃扉入禁林次則帥方面列臺閣與夫里居之太老灼然在人耳目俟來者為記焉

吳郡圖經續記卷上

吳郡圖經續記卷中

朱長文撰

橋梁 祠廟 宮觀 寺院 山水

橋梁 凡十五節

吳郡昔多橋梁自白樂天詩嘗云紅欄三百九十橋矣其名已載圖經逮今增建者益多皆疊石甃甃工奇緻密不復用紅欄矣然其名未嘗遍錄也近度支韓公子文為守命每橋刻名于旁懂之往來莫不見之其有各自古昔或近事可述者為記於此 右一

烏鵲橋在郡前舊傳有古館八曰全吳波龍門臨通頓昇

羽鳥鵲江風夷亭此橋因館得名白樂天詩嘗及之右二  
失履橋在吳縣西南吳王有織里以自名橋謂之失履俗  
訛也右三

皋橋在吳縣西北皋伯通字奉卿所居之地也伯通為漢  
朝議郎卒葬胥門西二百步號伯通墩昔梁鴻娶孟先同  
至吳居伯通廡下為人賃舂伯通察而異之乃舍之於家  
鴻卒又為葬之是可稱也哀江南賦云皋橋羈旅亦謂此  
右四

百口橋在長洲縣東故傳東漢之顧訓五世同居家娶百  
口衣食均等尊卑有序因其所居以名之右五

乘魚橋者故傳為琴高乘鯉升仙之地據劉向列仙傳云  
琴高趙人嘗入涿水中取龍子與弟子期二日皆齋潔待  
於祠旁果乘赤鯉來出坐祠中留一月復入水去涿一作碣不  
云在吳也列仙傳有英子者亦乘赤鯉升天吳中門戶皆  
作神魚遂立英祠未詳孰是右六

都亭橋在吳縣西北故傳吳王壽夢嘗於此作都亭以招  
賢士也苑橋定跨橋故傳皆闔廬苑園遊憇之地右七

臨頓橋在長洲縣北臨頓者亦吳時館名也陸魯望嘗居  
其旁皮日休贈之詩以謂不出郭郭曠若郊野今此橋名  
居櫛比蓋此郡又盛於唐世也右八

至德橋在泰伯廟前以廟名橋也

右九

孫老橋在運河上天聖初郡守禮部郎中直史館孫公冕所建也孫公治蘇民所畏愛故以名焉

右十

行春橋在橫山下越來溪中湖山滿目亦為勝處

右十一

新橋在盤門外自郡南出徒行趨諸鄉至木瀆者每過運河須舟以濟又當兩派交流之間頗為深廣故自昔未有為梁者今太守朝議章公下車有石氏建請出錢造橋者公立限替之即日而裁逾時而畢橫絕漫流分而三橋往來便之

右十二

三太尉橋在吳縣西昔廣陵王諸子各治園第此橋之西

巷蓋當時第三子所營治也今皆為居人占籍焉

右十三

吳江三橋南曰安民在新注中曰利民在七里注北曰濟民在吳注初澄源鄉並漕河有村十七家居河南田占河北民欲濟無梁郡從事夏日長為之建橋錢子高作記

右十四

吳江利往橋慶曆八年縣尉王廷墜所建也東西千餘尺用木萬計縈以修闌甃以淨甃前臨其區橫截松陵湖光海氣蕩漾一色乃三吳之絕景也橋成而舟楫免於風波徒行者晨暮往歸皆為坦道矣橋有亭曰垂虹蘇子美嘗有詩云長橋跨空古未有大亭壓浪勢亦豪非虛語也

右

祠廟 凡七節

泰伯廟在閭門內舊在門外胡官切 帝時太守麋豹所

建錢氏移之於內蓋以避兵亂也延陵季子侑祠焉右一

包山廟在洞庭唐人于此有祈而應魯望詩曰終當以疏

聞特用諸侯封右二

龍母廟在吳縣陽山郡中嘗于是祈雨而應民所欽奉右

三

常熟縣龍臺堂咸通中縣令周思輯以旱故崇龍于破山之潭上果雨以應于是為堂以祀之記刻今存破山即虞

山也父老以謂每歲有龍往來於陽山虞山之間其雲雨

可識 右四

慶忌廟在吳縣境慶忌吳王僚之子東方朔所謂捷若慶

忌也如聞俗訛為慶忌非也 右五

洞庭聖姑廟晉王彪二女相繼而卒民以為靈而祀之 右

六

孫學士祠堂在萬壽寺天聖中孫公冕守郡治獄不濫斷

訟如神施張在已無所吐茹吏民欽畏之嘗病癰民爭詣

佛寺祈福後又為之立祠吳民到今稱之 右七

宮觀 凡七節

天慶觀唐置為開元宮孫傳之亂四面皆為煨燼惟三門正殿存焉其後復修祥符中更名天慶觀皇祐之間新作三門尤峻壯右一

太和宮在盤門外其地唐相畢瑊之別業也瑊之子師顏及其子宗逸避巢寇之亂徙而家焉有戴省甄者幼孤從其母嫁畢氏宗逸無子省甄嗣之後省甄入道居開元觀開寶二年請施祖庄為宮錢氏賜額曰太和乃與弟子吳玄芝主其締架焉王允之嘗記其事仍有詩留題右二

靈祐觀在洞庭山唐之神景宮也蓋明皇時建內有林屋洞人間第九洞天也為左神幽虛之天即天后真君之便

闕真誥云向曲洞天左通林屋北通岱宗西通峨嵋南通羅浮言諸洞可以交達也舊傳禹治水過會稽夢人衣玄纁告治水法并不死方在此山石函中既得之以藏包山石室吳人得之不曉以問孔子孔子曰此禹石函文所謂靈寶經三卷蓋即此也吳先主時使人行洞中二十餘里上聞波浪聲有大蝙蝠拂殺火觀皮陸詩信然也又有白芝紫泉為神僊飲餌蓋列真往來其間唐時投龍於此因建宮天禧五年詔重修賜靈祐之名仍刻

敕文于石右三

洞真宮圖經云在古毛公壇上據皮陸詩毛公者劉根也

陸詩云古有韓終道授之劉先生身如碧鳳凰羽翼披輕  
輕按神仙傳云劉根字君安漢成帝時人舉孝廉除郎中  
後弃世學道入嵩山石室中崢嶸上下高五十丈冬夏不  
衣身毛長一二尺狀如五十許人其与人坐時忽然高  
冠玄衣人不覺也根自說入山精思無所不到蓋嘗至此  
也聚石為壇廣不盈畝舊傳毛公道成羅浮居山三百餘  
載有弟子七十二人夫神化恍惚萬里跬步夫亦何常哉  
有周先生隱遙宇息元唐正元中來遊包山之神景觀距  
觀五里見白鹿跪正即毛公塲也得異石一方上有虫篆  
即毛公鎮地符也得一井泉色白味甘即煉丹井也傍有

古池深廣袤丈旱歲不竭即毛公泉也此宮乃開成三年

建蓋因先生云

右四

上真觀在洞庭山上建於梁世唐僧皎然嘗陪湖州鄭使  
君登此却望湖水賦詩皮陸亦有此作詩中云昔有葉道  
士位當昇靈宮欲箋紫微志惟食虹景丹葉君不知何名  
也

右五

乾元觀在常熟一里虞山下梁天監五年張裕先生來此  
山栖遁十餘載夢神人告曰峰下之地面勢閑寂可以卜  
居裕如教興葺號曰招真昭明太子為之拱碑簡文帝嘗  
賜玉案一面鍾一口香百觔燭百錠陳拱于此其後改曰



乾元 右六

太一宮舊在郡中或傳在報恩寺之側太平興國中方士  
楚芝蘭言五福太乙天之尊神也太乙所在之處人豐樂  
而無兵疫凡行五宮四十五年一移以數推之當在吳越  
分請就其地築宮以祀之奏可六年十月蘇州言太乙宮  
成芝蘭又言都城東南地名蘇村可徙築宮於此以應蘇  
臺之名則福集都矣

太宗從之作太乙宮於都城之南而姑蘇之宮遂廢 右七

寺院 凡三十五節

自佛教被于中土旁及東南吳赤烏中已立寺于吳矣其

後梁武帝事佛吳中名山勝境多立精舍因于陳隋寢盛  
于唐唐武宗一旦毀去已而宣宗稍復之唐季盜起吳門  
之內寺宇多遭禁剽錢氏跡吳崇尢至于是修旧圖新  
百堵皆作竭其力以趨之惟恐不及郡之內外勝刹相望  
故其流風餘俗久而不衰民莫不喜蠲賦以施僧華屋邃  
廡齊饌豐潔四方莫能及也寺院凡百三十九其名已列  
圖經未載者錄于此至於湖山郊野之間所不知者蓋闕  
如也又有寺名見於傳記而今莫知其處者如晉何點兄  
弟居吳之波若寺又故傳唐有乾元寺戴逵 一本作之宅  
也宴坐寺張融之宅也又有龍華禪房唐慈崇福慈悲陸

鄉數寺皆建于六朝之間而龍華宴坐之類乃陸東之書  
今莫見之矣 右一

承天寺在長洲縣西北二里故傳是梁時陸僧瓚故宅因  
觀祥雲重二所覆請捨宅為重雲寺中誤書為重玄遂名  
之常蘇州登寺閣詩云時暇陟雲 古假切晨霽澄景光始

見吳都大千里鬱蒼二山川表明應湖海吞大荒即此寺  
也錢氏時又加繕葺殿閣崇麗前列恠石寺中有別院五  
曰永安曰淨土禪院也曰寶幢曰龍華曰圓通教院也所  
謂寶幢者舊曰藥師院昔有錢塘僧道贊者作紫檀香百  
寶幢覆以殿宇翰林趙承旨與當時諸公凡二十三人為

之贊云又有聖姑廟蓋梁時陸氏之女吳人于此祈子頗  
有驗 右二

永安禪院在承天寺垣中旧號彌勒院初 太宗朝以藏  
經綵板本有餘杭道原禪師者詣闕借板印造景德中又  
以 太宗御製四裘及新譯經一十四裘併賜之道原既  
歸藏于此院大中祥符八年又編修景德傳燈錄以進  
勅賜今額每歲度一僧至今為禪院 右三

報恩寺在長洲縣西北一里半在古為通玄寺吳赤烏中  
先主母吳夫人捨宅以建晉建興二年滄瀆漁者見神光  
照水徹天旦乃觀之乃二石像浮水上或曰水神也以三

牲巫祝迎之像泛流而去時吳人率僧尼輩迎于海濱入城置于通玄寺光明七晝夜不絕號其殿曰二尊建興八年漁者於滄瀆沙上獲帝青石鉢初以為凶類輩而用焉俄有佛像見于外漁者異之知其為二像之遺祥也乃以供佛梁簡文製石像銘云有迦葉佛維衛佛梵字刻于巖間唐天后遣使致珊瑚鑑一鉢一供于像前又有陸東之書碑開元中詔天下置開元寺遂改名開元金書額以賜之寺中有金銅玄宗聖容當天下降平富商大賈遠以財施日或有數千緡至于梁柱欂櫨之間皆綴珠璣飾金玉蓮房藻井悉皆寶玩光明相輝若辰象羅列也大順二年

為淮西賊孫傳焚毀其地遂墟同光三年錢氏更造寺於吳縣西南三里半榜曰開元并其僧遷焉即今之開元寺也今開元寺有瑞像閣乃別塑飾其帝青石鉢猶存周顯德中錢氏於故開元寺基建寺移唐報恩寺名於此為額即今寺也唐之報恩寺在吳縣之報恩山即支硎山也自梁武帝建寺經唐武宗殘毀至是乃移額於此寺有寶塔頃罹火災郡人復建巨殿窮極雕爚為東南之冠今僅畢工云寺有別院三曰泗州曰水陸為禪院曰法華為教院

右四

普門禪院在報恩寺旁景德中日本僧寐照號圓通大師

來貢京師 上召賜紫衣束帛 熙寧照願遊天台山 詔令縣  
道續食丁 晉公時為三司使 為言姑蘇山水奇 熙寧照願  
留吳門 遂居此院 朝宰諸公 並作詩送之 刻石院中 右五  
承天萬壽禪院 在長洲東南 錢氏時中 吳逆事丁 守鄴即  
晉公之祖也 於其所居 東南隔唐長壽寺之舊基 鋤荒架  
宇 祥符中 晉公請改 賜今額 天聖初 闢為禪刹 高僧住持  
相繼 崇飾最為闓 廣又有華嚴閣 祥符中有浮圖 自京趣  
蜀 刻造十六羅漢 像 乃來 錢唐布飾之 將還京師 至蘇 感夢  
遂留此閣 下郡中 士民祈請 數應 去年久雨 太守章公 岵  
迎禪月 像於郡廳 致請俄 遂晴霽 右六

雍熙寺在吳縣北 故傳郡人陸氏捨宅 以置 號曰流水 舊  
有三殿 三樓 高僧清閒 所建也 雍熙中 改今額 寺之子院  
三曰華嚴 曰晉賢 曰泗州 皆為講教之所 右七

瑞光禪院 在盤門內 故傳錢氏建之 以奉廣陵王祠 廟今  
有廣陵像 及平生袍笏之類 在焉 嘉祐中 轉運使李公復  
圭請本禪師住持 吳民競致力 營葺棟宇 胡官切 新相國  
富公有書頌 刻石院中 右八

廣化禪院 在長洲縣西 錢氏時 大校捨所居 以置 久而推  
敞 自嘉祐以來 稍二繕完 門廡 殿新 有藏院 可以安衆 右  
九

永定寺在吳縣西南梁天監中吳郡顧氏施宅為寺唐陸鴻漸書額蘇州罷郡寓居永定殆此寺邪舊在長洲界後於永定鄉安仁里 右十

壽寧萬歲禪院在長洲縣東南唐咸通中州民盛楚等建為猷若寺至道九年 敕賜御書四十八卷二年改今額吳地志郡中有猷若臺內有金銅像高一丈六尺高士戴顯所製訪之未得其遺跡此寺舊名猷若殆是歟 右十一 定惠禪院本萬歲之子院祥符中別改今額內藏御書歲得度僧一人雅為叢林唱道之所 右十二 大慈院在長洲縣北唐咸通三年陸侍御以宅為院號為

北禪祥符中改今額皮陸有北禪避暑聯句注云院昔為戴顯宅後司勳陸郎中居之即此是也 右十三

明覺禪院在長洲縣東南俗所謂東禪者晉開運中有僧遇賢姓林氏嘗以酒食自縱酒家或遇其飲則售酒數倍于他日世號為酒仙而能告人禍福必驗與符治病者必痊建隆二年來居是院創佛屋修路衢無慮用錢數百萬雖稱丐於人而人不知其所從得者蓋其容似靈巖智積聖者而每與人符以陳僧為識或謂其後身其塑像今存院中 右十四

朱明尼寺在吳縣西北舊傳東晉時有朱明者富而孝友

其弟聽婦言伐木壞宅欲弃兄異居明乃以金穀盡與弟  
惟留空室一夕大風雨悉飄財寶還明弟與婦愧而自縊  
明乃捨宅為寺右十五

雲岩寺在長洲西北九里虎丘山即晉東亭獻穆公王珣  
及其弟湛之宅咸和二年捨建精廬於劔池分為東西二  
寺二皆在山下蓋自會昌廢毀後人乃移寺山上今東寺  
皆為民疇西寺半為蓁蕪矣寺中有御書閣官廳白雲堂  
五聖臺登覽勝絕又有陳諫議華省王翰林偁葉少列參蔣  
密直堂真堂寺前有生公講堂乃高僧竺道生談法之所  
旧傳生公立片石以作聽徒折松枝而為談柄其虎跑泉

陸羽井見存比歲琢石為觀音像刻經石壁東嶺州堂亦  
為佳致惜已廢壞右十六

西庵禪院在虎丘西本屬雲岩後別為院蓋亦古西寺之  
地近歲頗增葺右十七

普明禪院在吳縣西十里楓橋楓橋之名遠矣杜牧之詩

及之張繼有晚泊一絕孫承祐嘗於此建塔近長老僧慶

來住持凡四五年修飾胡官切脩面山臨水可以遊息

旧或誤為卦橋今丞相王郤公頃居吳門親筆張繼一絕  
於石而楓橋字遂正右十八

壽聖義慈禪院在閭門外樞密直學士施公諱墓側近得

賜額 右十九

天峰院在吳縣西二十五里報恩山之南峰東晉時高僧支遁者嘗居于此故有支硎之號山中有支遁石室馬跡石放霍亭皆因之得名昔唐自有報恩寺在山麓故樂天夢得遊報恩寺作詩蓋自武宗時報恩寺廢雖吳葺不能復故皮陸猶有報恩寺南池聯句其後益淪壞至乾德中錢氏於報恩寺基作觀音院今名楞即其地也所謂南峰者乃古之報恩之屬院耳院枕巖腹躋攀幽峻自報恩寢衰而南峰乃興大中五年號為支山天福五年改曰南峰聖朝賜以今額禪老相承殿閣堂廡煥然一新矣山中危

壁竦立石門夾道前對牛頭山旁作西庵又有碧琳泉待月嶺南池新泉之類自昔著名故傳裴休書額已亡矣 右二十

天平寺在吳縣西南天平山下山有白雲泉始見於白公詩其寺建於寶曆二年乃樂天為蘇州刺史之歲蓋因泉以興寺也范文正公之先葬其旁 賜額曰白雲寺中有文正公祠堂 右二十一

澄照寺在長洲縣西北陽山下方俗以為丁令威所居圖經吳縣界有丁令威宅此殆是欵錢氏時有泉出於寺中因名仙泉後改曰澄照寺 右二十二

白蓮禪院本澄照別庵池中生千葉白蓮故以名院端拱  
初謝賓客濤嘗講學于院之西廡明年登第其子絳嘗刻  
石為記右二十三

秀峰寺在靈巖山梁天監中置既經一紀忽有異人於殿  
隅画一僧相俄而梵僧見之曰此智積菩薩也化形隨感  
靈應甚多儀相雖經傳繪吳民瞻奉至今彌勒此寺占故  
宮之境景物清絕旧乃律居不能興葺徒長紛訟太守晏  
公闢為禪刹人甚便之右廿四

堯峰院在吳縣橫山旁俗傳堯民於此避水蘇子美詩云  
西南登堯峰俗云堯所基洪川不能沒上有萬衆樓謂此

也唐末慧齊禪師首建精舍名曰免水後改曰堯峰蓋亦  
有所傳也登高極目鄰州隱然右廿五

楞伽寺在吳縣西南橫山下其上有塔據橫山之顛隋時  
所建有石記存焉白樂天及皮陸有詩載集中寺旁有巨  
井深不可測井有石闌二側有隋人記刻蓋楊素移郡橫  
山下嘗居此地又有寶積治平二寺相連皆近建也右廿六

明因禪院在橫山下廣陵王元璠墓在其旁故號荐福昔  
義懷禪師居此終焉院有藏經故傳廣陵姬媵所書右廿七

感慈禪院與荐福相並乃宣徽使鄭文肅公墳寺右廿八

智顯禪院在橫山下梁人吳廣施所居為寺號曰寶林錢



氏改名寶華故今名寶華山祥符中心印軻禪師重建殿  
堂徑藏合三百楹號為勝剎初額二和尚以錫扣石清泉  
為流雖水旱不增減軻師引泉足用訖今猶存右二十九  
光福寺在吳縣西南建於梁世近歲居人獲觀音銅像於  
水濱乃置寺中民間瞻奉頗有應感本郡人迎就城中祈  
請皆驗云右三十

高峰禪院在胥山故在洞庭近歲郡人張諮葬親于胥山  
下旁建精舍乃請移賜額于此諮弟曰詢今為戶部員外  
郎右三十一

水月禪院在洞庭山縹緲峰下抵吳縣百里建于梁廢于

隋至唐光化中有浮圖志勤者結廬于此因而經右候切一字

至數十百楹天祐四年刺史曹珪以明月名之大中祥符

中易今名山旁有泉甘潔歲旱不涸右三十二

孤園寺在洞庭梁散騎常侍吳猛之宅施為精舍右卅三

慧聚寺在崑山縣西北三里馬鞍山孤峰特秀極目湖海

百里無所蔽昔高僧慧響梁武帝之師宴坐此山二席為

侍感致神人願致工力乃請師之膠縣是夜風雷暴作喑

鳴之聲人皆聞之遲明殿基成矣延袤十七丈高丈有二

尺巨石轟然其直如矢非人力所能成縣令以聞武帝命

建寺敕張僧繇繪神於兩壁畫龍於四柱委鄉之民病癘

瘡者至壁下乃愈每陰晦欲雨畫龍凖二其潤鱗甲欲動  
僧繇又畫鏤以制之會昌中廢寺藏龍柱於郡中大中修  
復乃復以柱并金書牌鴻鍾還之至道中郡將陳公省嘗  
游是寺巖穴奇巧勝致甚多詩人孟郊張祐有詩今丞相  
王荆公次韻作之刻于石右三十四

興福寺在常熟縣破山為海虞之勝處齊州刺史倪德  
光捨宅為寺唐常建詩云竹徑通幽處禪房花木深山光  
悅鳥性潭影空人心即此地也山中有龍開澗唐正觀中  
嬪生白龍與一龍閉于此而成此澗有空心潭因常建詩  
以立名有御賜鍾唐懿宗咸通六年所賜有文舉塔體如

塔二人者唐之高僧也有救虎閣五代時僧彥周為席技  
箭于此有宗教院雜熙中高僧晤恩修天台教于此故以  
名云迺劉御史極宰邑作八咏以志其事云右三十五

山九十五節

吳郡諸山名載圖籍者甚衆不復殫紀輒再考傳記補其  
缺漏以資博覽云右一

帑丘山在吳縣西北九里舊經載之已詳吳越春秋越絕  
書之類皆以為闔閭所葬有金精之異故名帑丘然觀其  
巖壑之勢出於天成疑先有是丘而闔閭因之以葬也晉  
王珣撰山銘云帑丘先名海湧山又云山大勢四面周嶺

南則是山逶迤兩面壁立交林上合升降窈窕亦不卒至蓋  
得其實褚淵嘗嘆曰今人所稱多過其實今觀虎丘逾於  
所聞故傳以為江左丘壑之表云旧傳秦王求劍地裂為  
池太平寰宇記云山礪是孫權所發以求闔閭寶器是非  
未可必也礪側有平石可容千人故謂之千人坐傳俗因  
生公講法得名 右二

橫山在吳縣西南十道誌云山四面皆橫蓋以此得其名

也又名踞湖山

踞或作據

山中有陸雲墓今未審其處也觀是

山鎮此邦之西南臨湖控越實吳時要地隋開皇中嘗遷  
郡于橫山東亦以是山為屏蔽也山周圍廣甚環以佛剎

如薦福楞伽寶華堯峰之類皆在焉薦福寺旁有五塢皇  
祐中鄭度推官馮雲與山人仇道名之曰芳桂曰修竹曰  
飛泉曰丹霞曰白雲蓋因其物象云 右三

姑蘇山在吳縣西三十五里連橫山之北或曰姑胥或曰  
姑餘其實一也傳言闔廬作姑蘇臺一曰夫差也據左氏  
傳云闔廬食不二味居不重席器不雕鏤宮室不觀舟車  
不飾而吳越春秋言闔廬晝遊蘇臺蓋此臺始基於闔廬  
而新作於夫差也以全吳之力三年聚材五年而後成高  
可望三百里維楚章華未足比也初越王得神木一双大  
二十圍長五十尋巧工施校制以規繩彫治剝削錯畫文

章嬰以白壁鏤以黃金狀類龍蛇文彩生光獻於吳王  
大悅受而起姑蘇之臺申胥諫曰王既變鯀禹之功而高  
高下下以罷民於姑蘇吳民離矣夫堯既亡、麋鹿是游昔  
太史嘗云云登姑蘇望五湖而今人殆莫知其處嘗欲披  
草萊以訪之未能也 右四

胥山在吳縣西四十里寰宇記云吳王殺子胥投之於江  
吳人立祠江上因名胥山鄒善長水經云胥山上今有壇  
長老云胥神所治也下有九折路南出太湖闔廬造以遊  
姑胥之臺而望太湖也或曰姑蘇山一名胥山 右五  
紫萼山在吳縣西南一十五里圖經云形如獅子今以此

名山也鄒善長以為紫嶺山云俗說此本在太湖中禹治  
水後進近吳又東及西南有兩小山皆有石如拳紫云禹  
所用紫山也太湖中有淺地長老云是紫嶺山麓自此以  
東差深蓋閭巷之談云吳地記云吳王僚葬此山、旁有  
寺號曰思益樂天嘗遊之 右六

報恩山一名支硎山在吳縣西南二十五里昔有報恩寺  
故以名云所謂南峯東峰皆其山之別名峯也今有楞伽  
天峯中峰院建其旁樂天詩云淨石堪敷坐寒泉可濯巾  
即此山也 右七

研石山在吳縣西二十一里山西有石鼓亦名石鼓山越

絕書云吳人於研石置館娃宮揚雄方言謂吳人呼美女為娃蓋以西子得名耳吳都賦云幸乎館娃之宮張女樂而娛群臣即此謂也山頂有三池一曰月池曰研池曰玩華池雖旱不竭其中有水葵甚美蓋吳時所鑿也山上舊傳有琴臺又有響磔廊或曰鳴屐廊以梗梓籍其地西子行則有聲故以名云下有石室今存俗傳吳王囚范蠡之地山相連屬有曠村其山出石可以為研蓋研石之名不虛也嘗登靈巖之顛俯其區瞰洞庭烟濤浩渺一目千里而碧巖翠塢點綴於蒼波之間誠絕景也或曰晉陸玩施宅為寺即靈巖寺也 右八

陽山在吳縣西北三十里一名秦餘杭山一名四飛山有白堊可用巧埽潔白如粉唐時歲以供進故亦曰白塢山吳越春秋云越王葬夫差於秦餘杭山卑猶蓋即此也今澄照寺白蓮院在其下 右九

華山在吳縣西六十里於群山獨秀望之如屏長林荒楚蔚鬱幽邃或登其巔者見有石如蓮華狀蓋亦以此得名或云晉太康中曾生千葉蓮花也老子枕中記謂可以度難蓋巖穴深遠宜就隱也舊有興教院：據山半近歲改為禪剎 右十

天平山在吳縣西二十里巍然特高群峰拱揖郡之鎮也

林木秀潤瞻之可愛遊者陟危磴攀巨石乃至山腹其上  
有亭：側清泉冷：不竭所謂白雲泉也自白樂天題以  
絕句范文正繼之大篇名遂顯於世有卓筆峰卧龍峯中  
子峰五大峰石龜照湖鑑毛魚池大小石屋蓋因好事者  
得名 右十一

穿窿山在吳縣西六十里舊傳赤松子食桂實石脂絕食  
仙去嘗於此山採赤石脂吳郡賦云赤須蟬蛻而附處謂  
此也 右十二

包山在震澤中山有林屋洞昔吳王嘗使靈威丈人入洞  
穴十七日不能窮得靈寶五符以獻即此洞也水經注云

山有洞室入地潜行北通瑯琊東武俗謂之洞庭魯哀公  
元年夫差敗越於夫椒蓋即此山也或曰太湖中別有夫  
耕山蓋與此山不遠可以通稱湖中之山有謂之大雷小  
雷者三山者昔人或號曰三山湖舊傳震澤有七十二山  
唯洞庭最巨耳樂天嘗汎舟洞庭著於篇什陸龜蒙皮日  
休有太湖詩二十篇如神景宮毛公壇縹緲峯桃花塢明  
月灣練瀆投龍潭孤園村上真觀銷夏灣聖姑庙菴裏石  
版之類皆在此山蘇子美云洞庭民俗真朴歷歲未嘗有  
訴訟至縣吏庭下以來菘菹甘柚為常產每秋高霜餘丹包  
朱實与長松茂木相若於岩壑間望之若金翠圖繪之可

愛云右十三

崑山在本縣西北或曰在華亭蓋割崑山之境以縣華亭故也晉陸機與其弟雲生於華亭以文為世所貴時人比之崑岡出玉故此山得名右十四

海隅山在常熟山有二洞穴穴側有石壇週迴六十大山東二里有石室吳仲雍周章闔閭長子並葬此山西北三里有越王句踐畝梁昭明太子作招真治碑云虞山巫咸之所出也高巖鬱起帶青雲而作峰瀑布水懸流雜天河而俱會又云其峯有石城石門即此山也右十五

水凡十節

太湖在吳縣西南禹貢謂之震澤周官尔雅謂之具區史記國語謂之五湖其實一也吐吸江海包絡丹陽義興吳郡吳興之境其所容者大故以大稱焉書云三江既入震澤底定三江者北江中江南江也歷丹陽毗陵者為北江即今之大江也首受蕪湖東至陽羨者為中江分子石城過宛陵至于具區者為南江三江在震澤上下而皆入于海震澤之流有所洩是以底定今三江故道中絕故震澤有泛濫之患理勢然也所謂五湖者蓋所納之湖有五也郭景純江賦云包五湖以漫漭言江水經緯五湖而包注震澤也舊傳五湖之名各不同圖經以謂一曰貢湖二曰

遊湖三曰胥湖四曰梅梁湖五曰金鼎湖又曰菱湖鄞善  
長以謂長塘湖貴湖上湖湯湖與太湖而為五韋昭云胥  
湖蠡湖洮湖滬湖就太湖而五虞仲翔云太湖東通長洲  
松江水南通烏程霅溪水西通義興荆溪水北通晉陵滬  
湖水東連嘉興韭溪水凡五道謂之五湖陸魯望以謂太  
湖上稟咸池之氣故一水五名又為仙家浮玉之北堂故  
其詩曰嘗聞咸池氣下注作清瀆至今涵赤霄尚且浴白  
日又云古候切浮玉宛與崑閬一正此謂也湖中有山大  
小七十二洞庭其一也其大雷小雷山相去十里其間謂  
之雷澤或謂舜之所漁非也又有三山白波天合三點黛色

陸士龍贈顧彥先詩云我家五湖陰君住三山陽是此山  
也右一

淞江出太湖入于海韋昭以為三江者淞江浙江浦陽江  
也今浙江浦陽與震澤不相入韋說非也昔吳王軍江北  
越王軍江南越王中分其師以為左右軍銜枚泝江五里  
以須中軍銜枚潛涉吳師大北即此江也鄞善長云淞江  
自湖東北逕七十里江水分流謂之三江口吳越春秋云  
范蠡去越乘舟出三江之口入五湖之中此謂也庾仲初  
揚都賦注云太湖東注為淞江下七十里有水口分流東  
北入海為婁江東南入海為東江與淞江而三此非禹貢



東

借

Handwritten text on a halftone background, oriented vertically. The text is illegible due to the low resolution and high contrast of the image.

Handwritten text on a halftone background, oriented vertically. The text is illegible due to the low resolution and high contrast of the image.

之三江也今觀松江正流下吳江縣過甫里迤華亭入青  
龍鎮海商之所臻集也圖經云松江東瀉海曰滄瀆亦曰  
滄海今青龍鎮旁有滄瀆村是也江流自湖至海凡二百  
六十里所各有浦凡百數其間環曲而為匯者甚多賴疏  
濬而後免於水患或傳松江口故深久淤而不治稍一乃  
淺故可為梁以渡然或遇大水不能遽泄者以此也松江  
一名笠澤陸魯望君甫里號所著曰著笠澤叢書 右二  
運河出震澤傳稱吳城邗溝通江淮國語亦云夫差起師  
北征開為深溝通於商魯之間蓋由此河以通江北也隋  
大業六年敕開江南河自京口餘杭郡八百餘里面闊十

餘丈擬通龍舟巡會嵇陸士衡詩云閭門何峨峨飛閣跨  
通波樂天詩云平河七百里沃壤兩三州皆謂此水也歲  
旱或淺淤故常加浚治乃得無阻 右三

新河在城市杜荀鶴詩云夜市賣菱藕舡載綺羅蓋指  
此地祥符中崇儀使秦義守郡日嘗開廣之 右四

七堰者皆在州門外據樂天詩云七堰八門六十坊而圖  
經云廢堰十十有六蓋樂天指其近者言之也旧說蓄冰  
養魚之所或云所以遏外水之暴而獲民居近世城中積  
土漸高故雖開堰無甚患也 右五

越來溪在吳縣之境自太湖過橫山至於郡城之西蓋越

王由此水至于吳故得此名

右六

谷水據鄰善長云松江一東南行七十里入小湖自湖東南出謂之谷水谷水出小湖迤由拳縣故城下即秦之長水縣又東南迤嘉興縣城西鹽官縣故城南過武原出為澉浦以通巨海陸机詩云彷彿谷水陽眷恋崑山陰即此水也蓋此渠足以分震澤松江之水南入于海也後世谷水堙廢人不復知其名故吳中多水嘗質于老儒長者謂松江東流聚為小湖西北接白蜆馬騰谷瑋瑁四湖蓋所謂谷湖者即谷水之旧迹也又南接三泖三有上中下之名故傳陸士衡對晉武帝云三泖冬温夏涼蓋此地也泖

之狹者猶且八十丈又下接海鹽之蘆潛浦海鹽即武原也行二百餘里南至於浙江疑此即谷水故道水經以謂入海而此浦入江者蓋支流之異也梁大通二年以吳興水災詔遣前交州刺史王弁開大瀆導洩震澤以瀉浙江中蓋此浦是也浦旁頗有遺迹至唐時乃設堰以隔海潮嘉祐中姑蘇水災詔遣都官員外郎沈衡相視嘗欲開此浦未克興功

右七

崑山塘自婁門歷崑山縣而達于海即婁江也據鄰善長引庾仲初揚都賦注云太湖東注為松江下七十里有水口分流東北入海為婁江東南入海為東江與松江而三

也按婁者縣名今之崑山是也塘之兩岍又為六塘四十  
四浦六十四浮接引湖澤乃昔人所以泄其區之暴流備  
民疇之灌溉也右八

常熟塘自齊門北至常熟百餘里皆有注浦入蓋

醴其渠以洩水則有注引其流以至江則有浦其名甚衆

而崑湖陽城湖之水皆賴以泄焉右九

新洋江在崑山縣界本有故道錢氏時嘗浚治之號曰新

洋江既可排流潦以注松江又可引江流溉岡身也右十

吳郡圖經續記卷中

吳郡圖經續記卷

朱長文撰

治水 往迹 園第 冢墳

碑碣 事志

治水

地勢傾于東南而吳之為境居東南最卑處故宜多水昔  
禹之治水也因其勢之可決者疏而為三江因其勢之必  
聚者濬而為五湖乃底於定微禹功其能不魚乎自三江  
故道既廢而五湖所受者多以百谷鍾納之巨浸而獨洩  
于松陵之一川勢不能無浸溢之患也觀昔人之志亦勤

矣故以塘行水以涇均水以滕禦水以埭儲水遇淫潦可  
洩以去逢旱歲可引以灌故吳人遂其生焉前代經營之  
迹多不見史至唐元和中開常熟塘古碣僅存頗稱灌溉  
之利其郡守氏李名不著廉使氏韓韓皋元和三年錢氏時  
常置都水營田使以主水事募卒為都號曰撩淺蓋當是  
時方欲富境禦敵必以是為先務自國朝天禧天聖間吳  
中水災于是命發運使張倫同郡守經度於崑山常熟各  
開衆浦以導積水景祐中范文正公來治此州適當歉歲  
深究利病不苟興作公以謂松江不能盡洩震澤衆湖之  
水雖北歷揚子江東底巨海河渠至多堙塞已久不能分

其勢今當疏導諸邑之水東南入於松江東北入於揚子

與海也于是親至海浦開浚五河

詢之田老云  
徑之類是也

是時論

者沮之或曰江水已高不納此流或曰日有潮至水安得

下或曰沙因潮至數年復塞或曰開浚之役重勞民力公

以謂江海善下故得為百谷王豈能不下於此謂江水已

高不納此流者非也彼日之潮有損與益三分其時損居

二焉乘其損而趨之勢孰可禦謂日有潮至水安得下者

非也新導之河必設諸閘常時局之沙不能塞每春理其

閘外工減數倍亦復何患謂之曰潮至數年復塞者非也

東南所植唯稻大水一至秋無他望俾之遵達溝瀆脫百

姓於餓殍伏道使之雖勞不怨謂開浚之後重勞民力者非也于是力破浮議疏滄積潦民到於今受其賜有盤龍匯者介於華亭崑山之間步其徑纒十里而流穴迂緩逾四十里江流為之阻遏盛夏大雨則泛溢旁齧淪稼穡壞室廬殆無寧歲范公嘗經度之未遑具作寶元元年太史葉公清臣漕按本路遂建議醜為新渠道直流通其患遂弭厥後轉運使沈立之又開崑山之頽浦頗為深浚

納陽城湖南吐松江舊謂

之崑山塘隄防不立風濤相乘廢民疇阻舟楫盜剽鹽賈行其間吏莫能禁由唐以來欲修築未克也皇祐中王丞

相以舒州通判被旨來相水事荆公與縣吏拿舟編視訊其鄉人伴圖以獻至和中崑山主簿丘與權白郡守呂光祿居簡以為作塘有大利呂公從之於是謂民其後先設外防以遏其上流立橫埭以限之乃自下流浚而決焉既成號曰至和塘嘉祐之間吳人荐飢朝廷選擇守將恠制其事蔡秦州抗自投理典是郡常請行縣按水親度其利是時李兵部復圭為轉運使韓殿省正彥宰崑山於是大修至和塘使之胡官切厚民得因依立塍埭以免水患而韓君又開松江之白雀匯如盤龍之法皆為民利轉運使王純臣建議請令蘇湖常秀修作田塍佐、相接以禦風

濤令縣令教誘殂利之戶自作塍岸定其勸課為殿最當時推行焉其後論水者蓋多儒者傳肱欲決松江之千墩金城諸傳滙滌去淤滯又欲開無錫之五瀉堰以減太湖而入于北江導海鹽之蘆瀝浦以分吳松而入于浙水于崑山常熟二縣深闢浦港遇東南風則水北下於揚子遇西北風則水南下於吳松庶可纾患又今有田之家據項畝疏鑿溝港司農亟邦重請先取崑山之東常熟之北凡所謂高田者一切設堰蓄水以灌溉之又浚其溝洫使水周流於其間以浸潤之立柵門以防其壅則高田不涸而水田亦減流注之勢然後取 今之凡謂水田者除四湖

外一切罷去如某家注某家浜之類循古遺迹或五里七里而為一縱浦又七里或十里而為一橫塘因塘浦之土以為隄岸使塘浦濶深隄岸高厚則水不能為害而可使趨于江也邾衡命至蘇經度其事而工重後大不克成既朝廷置農田水利使者以專其事所以浚河渠固防岸通汰滄事在有司存可以按見其迹自熙寧之末旱災之後累年頗稔由是興作差簡然水旱之數古所不免而長民者不可以緩其防也嘗聞瀕海之地岡阜相屬俗謂之此天所以限滄溟而全吳人也雖有涇浦而日為潮沙之所積久則淤澱是不可以不治也夫治水者當沒其下下流



既通則上流可導也范文正公嘗與人書云天造澤國衆  
流所聚或淫雨不能無灾而江海之涯地勢頗高溝瀆雖  
多不決不節一本作下字如無所壅良可減害若其沒深江湖  
乃未愆亢之時萬戶歛漑此所以早潦皆為利矣此智者  
之言也范公之迹固未遠求其旧而續其功不亦善哉至  
於群賢衆說各有見焉擇其可行者裁而行之斯善矣夫  
事有異于古人而廢于後世有遺于前代而補于未今苟  
為古人所異者勿廢前之所遺者必補則何利之不成何  
病之不祛哉

往蹟凡二十六節

長洲苑吳故苑名在郡界昔枚乘諫吳王云漢修治上林  
雖以離宮積聚玩好園守禽獸不如長洲之苑游曲臺臨  
上路不如朝夕之池吳都賦亦云帶朝夕之濔池佩長洲  
之茂苑註云有朝夕池謂潮水朝盈夕虛因名焉庾信哀  
江南賦云連茂苑於海陵跨橫塘於江浦亦取諸此

闔閭城即今郡城也舊說子胥伐楚還鄉取丹陽及黃瀆  
土以築蓋利其堅也郡城之狀如亞字唐乾符三年刺史

張傳嘗修胡官切一字此城梁龍德中錢氏又加以陶甃右二

闔門故名闔閭門吳王闔閭時有之或云魯匠舛所製也  
有高樓閣道吳兵後由此出伐楚改曰破楚門吳屬楚復

曰閶門右三

吳小城白門蓋闔廬所作至秦始皇時宮守吏燭燕窟失火燒宮而此樓故存右四

魚城在吳縣西橫山下遺址尚存蓋吳王控越之地宜為吳城謂之魚城誤也橫山之旁岡勢如城郭狀今猶隱然又有射臺在橫山右五

石城在吳縣東北故為離宮越王獻西子于此山有石馬望之如人乘之右六

華池華林園南城宮故傳皆在長洲界闔廬之故迹也有流杯亭在女墳湖西二百步亦云游樂之地又有吳宮鄉

陸魯望以謂在長洲苑東南五十里蓋夫差所幸之別觀故得名焉魯望作問吳宮辭載總集右七

三泖在華亭境魯望詩云三泖涼波渙蕩動謂此也右八洞庭亦多吳時舊迹所謂練瀆者練兵之所也傳云越敗吳於夫椒夫椒即包山也湖岫極清處為銷夏渚乃吳王遊觀之地右九

雞坡墟者畜雞之所雞菴者畜彘之處走狗塘者田獵之地也皆吳舊迹並在郡界又有五茸各有名乃吳王獵所陸魯望詩云五茸春早稚媒嬌謂此也五茸今松江右十

蠡口在長洲界又謂之蠡塘昔范蠡扁舟浮五湖蓋嘗經此右十一

胥口在姑蘇山西北十二里因胥山得名右十二

壇塘在吳縣東南三十五里大江邊夫差十二年既殺子胥投尸於江浮以鳩夷葦後悔之君臣臨江作塘設劊祭奠百姓緣為立廟宋元嘉三年吳令從廟匠門內一云壇塘邊有酒城夫差祭子胥觀酒醉酒作因名之右十三

澣市在郡西二十五里圖經云秦王求吳王劍白虎蹲于丘上遂西走二十五里而失劍不能得地裂為池因名其地曰虎蹙者蓋此地是也唐諱虎錢氏諱鏐故改云澣市

右十四

胥屏亭在吳縣界漢初有陸烈字伯元為吳令豫章都尉既卒吳人思之迎其喪塋于胥亭子孫遂為吳縣人吳郡陸氏之所自出也右十五

袁山松城在滬瀆江側為波濤衝激半毀江中袁山松城東三十里夾江又有二城相對闔廬所築以控越處古人於海道固為之防矣右十六

死亭灣在閶門外七里故傳朱太守妻慚自經于此右十七

新郭在吳縣西橫山下隋阮平陳江南未服聚為盜賊隋文帝以楊素為行軍總管討之追擊至蘇州移郡邑於橫

山下蓋欲空其旧城耳此新郭者當時之遺址也或曰越  
王城亦在焉蓋此地吳越之所控守也初楊素遷城于橫  
山也匠者以楮木為城門之柱素見之謂匠者曰木恐非  
堅可閱幾年匠曰可四十年不朽素曰足矣是城不四十  
年當廢至唐貞觀中復旧城果如其言右十八

蓮塘寰宇記云在吳縣西十二里有田數畝生蓮花千葉  
華麤右十九

望市樓據元微之詩寄樂天云弄潮船更曾覩否望市樓  
還有會無注云望市樓蘇之勝地也今覩風樓為近市殆  
即此耳右二十

東城桂白樂天云蘇之東城吳都城也今為樵牧場有一  
桂株乎城下惜其不得已也詩德集右二十一

望亭在吳縣西境吳先主所立謂之御亭隋開皇九年置  
為驛唐常州刺史李襲譽改今名劉錫詩云懷人吳御亭  
謂此也右廿二

檀毅泉事其圖經泉在太湖之濱雖大風撓之不濁雖旱  
不耗此所以為異右廿三

滄瀆松江東寫海曰滄瀆陸龜蒙叙矢魚之具云列竹於  
海滢曰滄蓋以此得名今其旁有青龍鎮人莫知其得名  
之由詢於老宿或曰因舡得名按庾信哀江南賦云排青

龍戰艦南史揚素伐陳以舟師至三峽陳將戚欣以青龍  
百餘艘屯兵守狼尾灘揚素親率黃龍十艘銜枚而下擊  
敗之則青龍者乃戰艦之名或曰青龍舟孫權所造也蓋  
昔時嘗置舡于此地因是名之耳右二十四

吳王之時劍有干將莫邪甲有水犀舟有餘艦干將者劍  
工也莫邪者干將之妻也始干將作劍採五山之鉄精六  
合之金英候天伺地陰陽同光百神臨觀天氣下降而金  
鉄之精不銷于是莫邪曰神物之化須人而成今夫子作  
劍當得其人而後成乎於是干將妻乃斷髮剪爪投於鑪  
中使童男童女三百人鼓橐裝炭金鉄乃濡遂以成劍陽

曰干將陰曰莫邪陽作龜文陰作漫理干將匿其陽出其  
陰而獻之闔閭闔閭甚重之水犀者徼外有山犀水犀水  
犀之皮有珠甲山犀則無吳人蓋以水犀飾甲也餘艦者  
大舟也勾踐泝江襲吳入其郛焚其姑蘇徙其大舟即此  
也右二十五

大酒巷旧名黄土曲唐時有富人修第其間植花濬池建  
水檻風亭醞美酒以延賓旅其酒價頗高故號大酒巷右  
二十六

園第凡二十五節

伍子胥宅故傳在胥門旁子胥諫吳王不聽使子胥於

齊子胥屬其子於齊鮑氏還報吳王吳王聞之怒賜之屬  
鏤子胥曰吾死必抉吾目置之吳東門以觀越兵之入也  
右一

言偃宅在常熟西北宅中有井濶三尺深十丈井旁有壇  
壇北百步有浣沙石方四尺縣有言偃橋蓋得名于此子  
游以文學升聖師之堂吳人好儒術其有所自哉右二  
長鍊巷一名彈鍊巷在吳縣東北二里巷有馮煖宅煖客  
在齊孟嘗君之門彈長鍊而歌者也焚虛券以彰孟嘗君  
美聲說齊王以復孟嘗君相位其顯名也宜哉唐人云有  
墳在側碑刻猶存舊傳郡郭三百餘巷蓋皆有名而失之

惜哉右三

陸氏鬱林石初陸績事吳為鬱林太守罷歸無裝舟輕不  
可越海取巨石為重至姑蘇置其門號鬱林石世保其居  
唐史書之右四

晉東亭獻穆公王珣與其弟珉宅外在庖丘內在白華里  
後皆施以為寺昔庖丘東西二寺今之景德寺皆是也景  
德寺旧號庖丘廡院晉書云吳內史王珣有別館在武丘  
山戴逵潛詣之與珣遊處積旬後珣為尚書僕射上疏請  
名逵為國子祭酒而逵之名益顯右五

顧辟疆園王獻之入會稽經吳門先不識主人值辟疆方

集賓友酣燕園中而獻之遊歷既畢指麾好惡傍若無人  
辟雍勃然曰不足齒之愴尔使驅其左右出門獻之獨坐  
輿上展轉頽望而僕從不至遂移時蓋獻之二肆辟雍之  
隘也辟雍園唐時猶在頽况嘗假以居郡守贈詩云辟雍  
東晉日竹樹有名園年代更多主池塘復裔孫今莫知其  
所右六

戴顓宅故傳北禪寺是也顓父達字仲若嘗遊吳號吳中  
高士顓居剡下復游桐廬桐廬僻遠難以養疾乃出居吳  
下土人共為築室聚石引水植林開澗少時繁密有若自  
然三吳將守及郡內衣冠要其同游野澤堪行便去不為

矯介衆論以此多之右七

陸龜蒙宅在松江上甫里魯望唐相元方七世孫也始居  
郡中臨頓里晚益遂引深遁居震澤旁自號甫里先生有  
地數畝有屋三十楹有田奇十萬步有牛減四十蹄有耕  
夫百餘指而田汗下暑雨一晝夜則與江通色先生由是  
苦飢困倉無升斗蓄積乃躬負畚鍤率耕夫以為具蓋遂  
終身焉後以高士名不至李蔚廬携素與龜蒙善及當國  
召拜左拾遺詔方下龜蒙卒其居所遺基尚存右八

任晦宅見於皮陸詩有深林曲沼危亭幽砌而任君弃汪  
縣尉歸居於其間魯望詩云吳之辟雍園在昔勝槩敵前

聞當修竹後說紛在石風煙慘無主載祀將六百州色與  
行人誰能問遺迹不知清景在盡付任君宅據此殆即辟  
疆之園邪 右九

廣陵王元璩別宅舊與南園相近據九國志云元璩治蘇  
州頗以園池州木為意剡南園東圃及諸別第奇卉異木  
名品千萬今其遺跡多在居入之家其崇岡清池茂林珍  
木或猶有存者 右十

范文正公義宅在普濟橋旁宅之建舊矣有西齋已百載  
二松對植扶疎在軒文正公少長於此及還吳乃命齋曰  
歲寒堂松曰君子樹閣曰松風閣賦三題以規戒其昆季

子弟其後遂置宅為義宅使其族屬世世居焉既貴又於  
其里中買常稔之田號曰義田以養濟群族二之人日有  
食歲有衣嫁娶凶葬皆有贍擇族中長而能幹者一人主  
其計而時其出納為人日給米一升歲衣一縑嫁女者錢  
五十千娶婦者二十千再嫁娶與長幼之葬者皆有差公  
之令嗣顯於朝雖未歸吳而至今能修其法承其志不墜  
也故族中之仕者足以養其清族中之不仕者足以助其  
生蓋自古未有而文正公為之斯百世之師法也已 文正  
公詩見總集右十一

蘇子美滄浪亭在郡學東子美既以事廢乃南遊吳中一



日過郡學東顧州木鬱然崇阜廣水並水得微徑於雜花  
修竹之間趨走百步有弃地乃中吳鄣度孫承祐之池館  
也拘隆勝勢遺意尚存子美買地作亭號曰滄浪前竹後  
水之陽又竹無窮諸公多為之賦詩子美嘗謂吳中渚  
茶野醜足以消憂蓴鱸稻蟹足以適口又多高僧隱君子  
佛廟勝絕家有園林玲花奇石曲池高臺魚鳥留連不覺  
日暮遂終此不去者焉右十二

程正議宅在南園旁公少而軒關有才志因過隙地右開  
元瑞光二寺在南園嘗曰此可以為宅也及稍顯遂得其  
地卜居焉太守晏公贈之詩云衣冠雖盛皆儻奇青瑣仙

郎獨我鄉蓋衣冠之居郡固多唯公實吳人也晏公又名  
其坊曰畫錦以志焉右十三

故資正殿學士太子少保元魏公宅在帶城橋東元公嘗  
參大政引<sup>年</sup>歸老居於是邦太守章公命其宅曰袞繡坊右  
十四

先先祿園在鳳皇鄉集祥里高岡清池喬松壽檜粗有勝  
致而長文棲隱於此號曰樂園右十五

冢墓凡十五節

巫咸墳在門門東北三里巫咸商太戊時賢臣也書曰伊  
陟贊於巫咸作咸又四篇離騷云巫咸將夕降兮懷椒糈

而要之說者以為巫咸古神巫也旧傳有墓于此故書之  
圖經亦云虞山者巫咸所居然則咸常在吳矣平門又名  
巫門為此故也吳王壽夢楚之大夫申公巫臣適吳圖經  
云巫臣冢在將門外非與此同右一  
秦伯墓皇覽云在吳縣北梅里聚去城十里劉昭案無錫  
縣東皇山有秦伯冢去墓十里有旧宅其井猶存二說固  
不同今吳縣無錫界俱有梅里之名未知孰是要當訪之  
耳右二

仲雍墓太平寰宇記云常熟虞山有仲雍齊女冢東是仲  
雍西是齊女仲雍比德秦伯孔子謂虞仲夷逸隱居放言  
身中清廢中權班固以虞仲者仲雍也梁昭明太子作虞  
山招真治碑云遠望仲雍而高墳蕭瑟旁臨齊女則哀隴  
蒼茫盖梁時猶可見也右三

女墳湖在吳縣西北六里吳越春秋以謂吳王小女因王  
食蒸魚辱之不忍久生乃自殺一說夫差小女字幼玉觀  
父之過憂國之危願與韓重者為偶志願不果結怨而死  
夫差痛思之以金棺銅槨葬之間門外葬已祭之其女化  
形而歌曰南山有鳥北山張羅鳥既高飛羅將奈何志欲  
從君諗言孔多悲怨成疾歿身黃坡竊謂此詩亦有深旨  
殆此女生時所賦邪南山有鳥喻越也北山張羅喻制越

非其所也鳥既高飛句踐之盛也羅將奈何夫差不可以  
制越也志欲從君謬言孔多謂雖欲從父之命奈何其聽  
諛言而忘忠義也彼韓重之怨蒸魚之忿恐非也墳之為  
湖或曰墓所陷也或曰取土為墳鑿而成也右四

齊女墓在虞山吳太子所娶也齊女憂思發病且死謂太  
子必塋我虞山上倘死而有知猶望故國吳王從之孟子  
謂齊景公既不能令又不受命是絕物也涕出而女於吳  
既此也右五

吳王夫差墓在吳縣西北四十里餘杭山猶亭卑猶之位  
今名陽山者是也地近太湖夫差棲於姑蘇山轉戰西北  
敗于干遂夫差既伏劍死越王令干戈人以一塚土塋之  
秦餘杭山卑猶亭墓亦塋其旁右七

言偃墓在虞山上與仲雅墓並列右八

漢梁鴻墓在吳縣西四里要離墓北後漢書云梁鴻字伯  
鸞扶風平陵人娶同郡孟光字德耀共至吳依皋伯通鴻  
閉門著書十餘篇疾且困告主人曰昔延陵季子塋子於  
羸博之間慎勿令我子持喪歸去及卒伯通塋於吳要離  
冢旁咸曰要離烈士而伯高清高可令相近葬畢妻子歸  
扶風唐陸龜蒙云在金閶亭一里續志云今閶門南城內  
有古塚二相傳為要離梁鴻墓金昌亭在城內宋書可證

漢豫州刺史孫堅及其妻吳夫人會稽太守策三墓並在盤門外三里載唐陸廣微吳地記墓前有小溝曰陵浜鄉俗稱為孫王墓按吳書堅死于初平三年三十七策死于建安五年二十六堅妻吳氏死于建安七年合葬堅墓黃龍元年權追尊堅為武烈皇帝廟曰始祖墓曰高陵吳氏為武烈皇后策為長沙桓王太元二年八月朔大風拔吳高陵栢松石碑蹉跌按晉陽秋云惠帝元康中吳令河東謝詢表為孫氏二君墓置守冢五人修護掃除有詔逆之其文張俊所作今載文選盤門外大冢是也又唐孫德琳

墓志云開元十年窆於十四代祖吳武烈皇帝陵東南平地續志云魏吳綱立孫堅廟在縣東北策祠在縣南右十張翰葬橫山東五里翰吳人見机而作託意蓴鱸歸以數卒可謂高行之士墳雖亡而名宜存也 右十一

顧三老墳在婁門外 塘北蓋顧綜墳也綜字文緯吳人辟有道歷御史大夫尚書令殿上三老漢明帝襲三代之禮正月上日踐辟雍殿設几杖乞言受誨焉吳丞相難其裔孫也綜於東漢書無傳事見顧况所撰廟庭碑銘云刊石婁門德輝不滅碑亡 右十二

史惟則墓吳城下惟則字天問吳人也工八分飛白二篆

在唐中葉工以八方名家者四人惟則與韓擇木蔡有隣  
李潮也歷集賢翰林學士卒右十三

廣陵王元璩墓在橫山元璩字德輝武肅之子文穆之兄  
也為中吳節度文穆既襲位元璩來覲置宴宮中用家人  
礼文穆起酌酒為壽曰先王之位兄宜當之俾小子至是  
實兄推戴之力元璩俯伏曰王功德高茂先王擇賢而立  
君臣之分敢忘忠順因相頌感泣酣樂而罷元璩卒子文  
奉嗣為中吳節度涉獵經史好賓客飲兼數人常乘白驪  
披雀氅泛舟池中遠近聞賓客笑語聲則就飲為樂卒官  
亦葬橫山右十四

范文正公之先墓在太平山下置祠堂于白雲院中每歲  
清明大合族人以義田之資設盛饌祭掃至今修之近世  
諸公墓於郡境者固多知之不詳未悉書也右十五

碑碣凡九節

朱氏墓碣在吳縣西穹窿山奇俗傳云買臣之墓非也按  
舊經云買臣冢在嘉興縣界不在此也墓旁有碑已漫滅  
其字可讀者云一十六世四百一十九年居下邳自平始  
三年避地至會昌壬戌凡八百四十二年籍于吳故邳村  
之名由下邳之來也請序朱氏過江之祖文孝廉除郎中  
舉有道茂才辟大將軍府除長水校尉文當漢綱既壞天

天下大柰公側足虺蜴逕逾江關其後大槩叙子孫官爵  
此蓋唐人追叙朱氏過江之祖石字堙泐譜系不傳惜哉  
又按唐志載朱氏世系漢司隸校尉禹坐黨錮誅子孫避  
難丹陽丹陽朱氏之祖也蓋丹陽亦有朱氏右一  
春申君廟碑史惟則書又嘗太伯廟碑重玄寺額今失之  
右二

閶門額李陽冰篆今已失之

右三

武丘東山碑龍興觀碑皆陸東之書右四

右四

包山神景觀林屋洞院碑唐開成三年建石已殘缺据其  
所述蓋唐肅宗時有自潤州刺史求入道者又云乃去權

位散祿親知草屨杖藜游乎山岳至此山於洞之西門造  
玄壇立室修玄元真容而石刻斷折莫知其姓名為誰氏  
其銘有云毛公唐君前後出處蓋唐君斯人也碑中亦述  
周息元之事云止於內殿帝頻見就問以道德之門乃獻  
諫書周毗聖化其文間可見不能詳知噫高士之節固難  
得偶一有焉人遠遁山澤不與人接其名聞于王公大人  
者幾希矣如此碑所載者既不見于史冊託之金石又復  
磨滅綴拾存之而不得其胡官切惜哉右五  
報恩寺慧敏律師碑銘台州司馬陳諫謨蘇州刺史元錫  
書字刻刻缺碑云遷神建塔于寺之西南隅當八隅泉池

之上中峰蘭若文缺蓋有所謂八隅泉池者皮陸集所謂南池者是邪今不見其迹右六

天台大德元浩和尚靈塔碑頌太原少尹崔恭談元浩姓秦氏字廣成智者大師之六世孫荆溪和尚之法子翰林

學士梁肅蘇州刺史田敦及崔恭皆受業弟子起塔文具總集右七

丘東山南原文具總集右七畫龍記長洲令廳事北廡有畫龍六僧繇弗興之舊度摸之不知何人其工不謝二子也唐李紳為記其事碑刻猶存

右八周先生住山碑在洞庭山唐華州刺史令狐楚譔右九

事志 凡二十七節

泰伯三以天下遜延陵季子三以國遜孔子謂泰伯至德民無得而稱焉其於春秋書曰吳子使札來聘於札之墓也題曰嗚呼有吳延陵季子之墓賢之也吳越春秋云古公病將卒令季歷歸國於泰伯而三遜不受蓋孔子稱三遜者著其實也詩云維此王季罔心則友美王季之友泰伯是王季嘗歸國于泰伯而泰伯不受又為虛言也吳王壽夢有子四人長曰諸樊次曰餘祭次曰餘昧次曰季札季札賢而壽夢欲立之季札辭不可諸樊乃攝事當國已除喪致位季札季札又辭吳人固立焉季札弃其室而耕乃

令之諸樊卒授弟餘祭欲傳以次必致國於季札以稱先  
王之意餘祭卒弟餘昧立餘昧卒欲授季札又逃去是三  
遜其國也然泰伯遜而周興季札遜而吳止其所遇則然  
也其清風大節足以興萬古之善所補豈小哉宜血食於  
吳不絕也 右一

昔孔子登泰山見吳門有白馬如練此論者傳聞之誤而  
好奇之過也孔子雖至聖其視听與人同耳吳魯相去奚  
啻數千里安能見白馬如練哉昔王充論衡嘗辨之矣 右二  
吳王夫差之盛也越王與范蠡入臣隸于吳或曰囚也蓋  
三年而後得歸越其所以斷大謀成伯業蠡之功居多句

踐之滅吳也師還至五湖范蠡辭於王曰君王免之臣不  
復入越國矣越王曰吾將與子分國而處之范蠡對曰君  
行制臣行意遂乘輕舟以浮於五湖王命金工以良金寫  
范蠡之狀而朝禮之環會稽三百里以為范蠡地左丘明  
著國語蓋與范蠡同時猶曰莫知其所終極而太史公以  
謂浮海出齊變姓名自謂鴟夷子皮耕于海畔老居陶號  
陶朱公嗚呼蠡能霸其君壽其身智哉 右三

禦兒者地名也國語曰句踐之地南至句無北至於禦  
兒又句踐曰吾用禦兒臨之而俚俗之言以禦為語曰范  
蠡獻西子於吳道中生子至此而能語又從而為之說曰



吳既亡西子從范蠡以行杜牧亦云西子下吳邦一舸逐  
鷓夷夫蠡之智足以顯君而保躬必不陷於污也昔武王  
伐紂誅妲己而高穎請誅張麗華孰謂蠡不如高穎乎右  
吳旧號句吳盖方俗之辭猶越之為於越也又說者曰吳  
者虞也泰伯于此以虞為志也右五

張良七世孫曰睦字選公為漢蜀郡太守始居吳郡吳郡  
張氏皆其後也右六

褚伯玉字元璵錢塘人也少有隱操遂往剡居瀑布山在  
山三十餘年隔絕人物王僧達為吳郡苦禮致之停都信  
宿繆交數言而還寧朔將軍丘珍孫與僧達書曰聞褚先

生出居貴館此子減景雲棲不事王侯有年載矣自非折  
節好賢何以致之僧達荅書曰褚先生送白雲游舊矣近  
故要其末此真慰日夜比談討送桂借訪薜蘿若已窺烟  
液臨滄洲矣昔丘丹荅韋應物詩云還同褚伯玉入館忝  
州人謂此也右七

晉顏含以孝友聞自西平縣侯拜侍中除吳郡太守王導  
問含曰卿今蒞名郡政將何先荅曰王師歲動編戶虛耗  
南北權豪競招遊食國弊家豐孰事之憂且當徵之勢門  
使反田桑數年之間欲令戶給人足如其禮樂俟之明宰  
含所歷簡而有恩明而能斷然以威御下導嘆曰顏公在

事吳人歛手矣未之官後為侍中

右八

晉何求字子有弟點字子哲嗣

祖避太

諱字子季簡穆公尚之

孫也何氏過江自晉司空充並塋吳西山求除中書郎不  
拜隱居吳之波若寺足不踰戶人罕見其面後隱武丘山  
齊永明四年拜大中大夫不就卒點不入城府性率到好  
狎人物遨遊人間不簪不帶以人地並高無所與屈大言  
箕踞公卿禮下之或乘柴車州屨恣心所適致醉而歸累  
召中書侍郎太子中庶子不就點少時嘗病渴利後在吳  
中石佛寺建講於講所晝寢夢一道人形貌非常授凡一  
掬夢中服之自此而差梁武帝與點有旧賜麋皮巾并名

之點以巾褐引入華林園帝贈詩酒仍詔拜侍中辭疾不  
起子季以會稽山多靈異往遊焉居若邪山雲門寺初子  
季二兄求點並棲遁求先卒至是子季又隱世以點為大  
山子季為小山亦號曰東山兄弟又謂點為孝隱子季為  
小隱世號何氏三高子季年七十餘乃移還吳居武丘山  
西寺講經論東境守宰徑塗者莫不畢至梁武帝詔為特  
進不起給白衣尚書祿固辭不受卒年八十六

右九

陸慧曉字叔明張融字思光皆吳人也慧曉清介正立不  
雜交游時人以為江東裴樂也融弱冠有名行已卓越慧  
曉與融並宅其間有池：上有二株楊柳何點嘆曰此池

便是醴泉此木便是交讓武陵王暉守會稽以慧曉為征虜功曹與府參軍劉璉同從述職璉清介士也行至吳謂人曰吾聞張融與慧曉並宅其間有水必有異味故命駕往酌而飲之曰飲此水則鄙吝之萌盡矣慧曉為南充州刺史融為司徒左長史卒舊傳有交讓瀆與乘魚橋相近蓋因張陸得名也 右十

江左時三吳舊有鄉射禮羊玄保為吳郡嘗行之後久不復修蔡興宗為會稽太守行之禮儀甚整 右十一

南史稱汝南周洽歷吳令廉約無私卒於都水使者無以殯歛吏人為買棺器傳翻亦有能名為吳令別建康令孫

廉二因問曰聞丈人發姦摘伏惠化如神何以至此荅曰無他也惟勤而清二則憲綱自行勤則事無不理憲綱自行則吏不能欺事自理則物無凝滯欲不理得乎翻位至驃騎諮議 右十二

虎丘有清遠道士同沈恭子遊寺讀幽獨君詩清遠道士所稱自商周至秦漢末以鬼神自謂顏魯公愛之遂刻于巖際并有繼作李衛公又從而和之幽獨君詩大曆中于劍池石壁隱出觀察使李道昌以聞于朝代宗敕道昌祭之此亦甚異也 右十三

張長史吳縣人也為人倜儻閑達卓尔不群所遊者皆一

時豪傑其艸書入神品初為常熟尉有老叟陳牒既判去不數日復來長史怒而責之曰汝何以細故屢擾吾官府也叟曰觀君筆迹奇妙欲以藏篋笥耳非有所論也因問所藏盡出其父書長史視之曰天下奇書也自此益書其法性嗜酒每大醉呼叫狂走下筆愈奇嘗以頭濡墨而書既醒視之自以為神不可復得也世以呼張顛後為金吾長史右十四

韋應物正元初為蘇州刺史是時房復孺為杭州刺史皆豪人也韋嗜詩房嗜酒其風流雅韻播于吳中或目韋房為詩酒仙韋立性高潔鮮食寡欲所在焚香掃地而坐唐

人賢而慕之不敢名皆曰韋蘇州云右十五

杜牧詩云我憂朱處士三吳居中央罷亞百頃稻西風吹半黃又云我昔造其室羽衣寫雀翔交橫碧流上竹映琴書床出俗無近語堯舜禹武湯此詩知處士之賢也然莫知其名而他書亦無所見惜哉右十六

圖經每歲有丁身錢自大中祥符四年詔以兩浙福建路荆湖南北廣南東路在偽國日出丁身錢並特除放凡歲免緡錢四十五萬有餘貫由是蘇民至今無計口算緡之事蒙澤最厚右十七

謝賓客濟字濟之既冠居吳中會汾晉平郡國當表賀吳

士為奏者文體弱更數人皆不能如郡將意謝公私州之  
為人持出郡將大稱惟吳中先生亦自愧不及故王黃州  
羅拾遺處約並為吳之屬縣長謝公與之遊羅嘗與王書  
云濟之揚權天人蓋吾曹之敵其為名流推重如此右十八  
王黃州禹偁字元之嘗為長洲宰其風流篇什播於一時  
由此遂拜拾遺故其詩云吳門吏隱過三年何事陶潛捧  
詔還步武已趨龍尾道夢魂猶憶席丘山今席丘至今有  
画像存焉他詩皆具總集 右十九

丁晉公吳人大中祥符中叅豫大政八年出為平江節度  
使知昇州擁節旋還本鎮過鄉拜墓播紳榮之吳人自陸

宣公後至公為宰相歸葬于華山習嘉原右十二

兩浙轉運使治所初在吳郡孫何漢公自京東遷二浙實  
居于此作三亭一曰自公於此退處也二曰溫故於此閱  
書也三曰艤舟于此繫舟以備巡按也有三亭記見集中  
右二十一

姑蘇刺史有若范文正公富監皆牧鄉郡葉少列先典州  
阮而請老其子道卿以本路漕節來侍其孫公秉熙寧中  
又為郡守蔣希魯再牧是邦遂歸休於此盛文肅胡武平  
趙抃平後至政府皆盛事也右二十二

平江節度推官廨舍晉甚隘陋天聖中武寧章岷伯鎮居

幕府始廣而新之伯鎮時名藉甚初登第翰林諸公賦詩  
贈行其廨舍記并記刻猶存當是時盛翰林度黃工部宗  
旦守郡多以事委伯鎮而伯鎮之弟伯瞻及今太守朝議  
公同侍親居此士大夫多稱之伯瞻後至太常少卿按漕  
廣東云 右二十三

章太守嘗言伯鎮之在幕也盛文肅公委之遍閱經史凡  
言吳事者錄為一書其書在盛氏人不復見之惜哉 右廿四  
許洞以文辭稱於吳尤邃左氏春秋嗜酒嘗逆酒家貸飲  
一日大罵壁作歌數百言鄉人競來觀之售數倍乃盡捐  
其所負 右二十五

陳氏有兩高士曰郢曰之奇郢不聞其字范文正公以先  
生稱之錢氏婦朝也郢有兄七人皆仕宦而獨隱居里中  
以琴書自樂好佛老晚不茹葷者十五載丁晉公其甥也  
欲荐以官郢拒之晉公以詩誦美嗚呼可不謂高士哉之  
奇字虞卿謝隴西郡王宅教授以婦十八年而終嘗有詔  
起之不行也持身謹嚴而外簡曠不為矯刻之行衣冠者  
舊置酒相過從虞卿遇其輒往未嘗視其人以為高下鄉  
人愛之逢於道者必肅容起恭相語曰此吾陳君子也孝  
友愷悌賄贍宗族雖貧而竭力吳人言家行者必推虞卿  
其美也今丞相王公為之銘號曰陳君子云 右二十六

元豐四年資政殿學士太子少保元魏公絳正議大夫集賢殿修撰程公師孟相繼請老居吳中二公交契最密又同還里第時太守朝議章公岵亦平昔僚舊于是良辰美景往來置酒以相娛樂又嘗盛集諸老以繼會昌洛中之宴作新詞以歌焉右二十七

雜錄 凡十五節

吳都賦云鄉貢八蚕之綿蘇州舊貢絲葛絲綿八蚕絲緋綾布白角簞州席鞣大小香杭柑橘藕緇皮鮫鰓鴨胞肚魚菓子白石脂蛇粟皆具唐志右一  
大業中吳郡送扶芳二百本敕西苑種之其木蔓生纏他

木葉圓而厚凌冬不凋夏月取葉微炙之以為飲色碧而香美令人不渴有籌禪師妙醫術以扶芳葉為青飲人獻菰菜裹二百斤其菜生于菰蔣之下形如細菌色黃赤如金梗葉鮮嫩和魚肉甚美七八月生薄鹽裹之入獻右二  
大業中吳郡送太湖白魚種子較苑內海中以草把別迂著水邊十餘日即生小魚其取魚子以夏至前三五日白魚之大者日晚集湖邊淺水中有菰蔣處產子綴著草上是時漁人以網罟取魚然至二更則產竟散歸深水乃刈取菰蔣州有魚子者曝乾為把運送東都至唐時東都猶有白魚右三

大業中吳郡所獻有海鮓魚乾膾四瓶浸一瓶可得徑尺  
面盤十盤帝以示群臣云昔術人介象於殿廷釣得此魚  
此幻化耳亦何足珍今日之膾乃是東海真魚所作來自  
數千里亦是一時奇味虞世基云術人既幻其膾固亦不  
真出數盤以賜達官海魚肉軟而不腥雅已經久乾以法  
修之可食也又海蝦子四十挺色如赤琉璃光徹而肥美  
勝鱸子數倍又獻鮓魚含肚千頭極精好念于首含肚也  
松江鱸魚乾膾六瓶二容一斗取其香柔花葉相間細切  
和鱠搽令調勻鮓魚肉如雪不腥所謂金齏玉膾東南之  
佳味也紫花碧葉間以素膾鮮潔可愛蜜蟹二十頭攤劍

四甕攤劍似蟹而小一鰲偏大吳郡賦所謂烏賊攤劍也  
鯉腴鮓四十瓶肥美冠于鱸鮓乾膾之類作之皆有法時  
有口味使杜濟二會稽人別味善於鹽梅然暴殄海物以  
縱口腹之欲卒至於亡國茲可以為戒也 右四

大業中楊玄感反吳人朱燮晉陵人管崇起江南應之兵  
十萬隋將討之不能克帝遣江都贊治王世充發淮南  
兵三萬討平之初世充渡江三戰皆捷至毘陵開城以迎  
即日進軍賊據潘封柵斷路世充運薪數萬圍通柵縱火  
之賊潰死者十四五餘眾保無錫世充又拔之賊守白方  
柵世充軍至出柵而迎世充並許其首不罪追吳人魁帥



先降者數十人於通玄寺瑞像前燃香誓不誅殺吳人聞  
之一旬之間歸者略盡世充貪其子女財貨坑降者  
八千人於橫山下獲貲巨萬送女八十餘人將還進之帝  
並以賜世充世充將至家其妻盧氏見之憤惋即日卒  
武德之際世充遂至穢夷負誓殺降不詳之極右五  
蘇之東禪院古佛像容貌端麗頂珠圍徑數寸乾符甲午  
歲忽有豪光紅黃青紫于是士庶觀瞻擅施山積後三日  
有老所由感其事因請梯升即佛光焰而窺之乃見佛之  
首有一穴捫之有二白鼠長可尺餘自穴躍出綠光焰入  
藻井斯人遂探得碎幡數斤以紅幡映頂珠即紅光出青

黃紫亦然人皆欲息而去鹿門子曰佛金仙也而白鼠之  
禍作光于頂得非金氣盛乎是後金革遂興右六

中和二年僖宗狩蜀潤帥周寶以子僭楊茂實為蘇州刺  
史溺于妖巫作妖廟于子城之南隅祭以牲牢外用炭百  
餘斤燃于廟庭自是吳中兵火荐亦被髮伊川之先兆歟  
右七

光啓初董昌知杭州軍事浙西周寶惧其強乃用徐約為  
蘇州刺史以禦之約至未逾年建九江王廟殿堂屋壁塑  
神龍蛟螭繪画雲雷波濤之狀自是姑蘇連大水民飢不  
粒食者三載傳曰妖由人興象不自作其斯之謂乎右八

洞庭山出美茶舊入為貢茶經云長洲縣生洞庭山者與  
金州蘄州味同近年山僧尤善製茗謂之水月茶以院為  
名也頗為吳人所貴右九

張又新品天下之水其二慧山泉三席丘井六松江陸魯  
望好之高僧逸人時致以助松江水或以為第四橋者最  
佳蓋差遠井邑宜更清耳以江水醜酒特佳于他處昔人  
重若下酒亦以溪水為美耳右十

唐世蘇州進藕其最佳者名傷荷藕或曰葉甘為蟲所傷  
或曰故傷其葉以長根又多重臺蓮花二上復生一花亦  
異也右十一

唐時重玄寺閣一角忽墜計數千緡方可扶薦一匠云不  
足勞人請得一夫斫楔可正也主寺者從之僧食訖擲持  
楔數片登高敲闢未逾月閣柱悉正右十二

吳縣有利娃鄉吳人以美女為娃蓋宜為麗娃右十三

圖經吳縣境有定山粟山者殆編錄之誤也按謝靈運詩  
云朝發漁浦南暮宿富郭定山杳雲霧赤亭無淹泊者  
乃浙江中粟山有飛泉石杵吳先生刻題者在錢塘縣西  
右十四

吳江舊有如歸亭俯視江湖為天下絕景處昔人題咏最  
多慶曆中知縣事張先益修飾之蔡君謨為記其事熙寧

中林郎中肇出宰又于如歸之側作鱸鄉亭以陳文惠有  
秋風斜日鮎魚鄉之句也亭傍画范蠡張翰陸龜蒙像謂  
之三高好事者為美右十五

書吳郡圖經續記後

昔楊子雲有言仲尼多愛愛義也子長多愛二奇也予嘗  
患之今記述類多博收泛採譬猶廣塵大肆百物群品雜  
然陳列於前而無所別異此記述者之公患也薛曹朱伯  
原少以文學第進士退居吳郡博覽載籍多所見聞因  
為圖經續記以補闕遺觀其論戶口則繼之以教陳風俗  
則終之以節至於辯幼玉之怨正語兒之妄紀譚生之訛  
其論議深切著明皆要之禮義與夫牧守之賢人物之美  
事為之善凡前言往行有足稱者莫不褒嘉歎異重複演  
說信乎所謂君子於言無苟者予每至伯原隱居愛其林

圃臺池逍遙自樂及得斯記觀之然後又愛其趣識志尚  
灑然有異于人使逢辰彙征則其所攄發豈易量哉惜其  
遺逸沈晦而獨見於斯記故為書其后以待知伯原者元  
祐元年四月十五日臨邛常安民書

圖經續記後序

余家自伯父皇考洎諸父奉王大母大母來居于蘇著籍  
此州者五十年矣今帶城橋儒學坊為吾家傍也橫山之  
寶華二山之博士塲吾家三世之所葬也余雖少長于蘇  
而山川城邑津梁園觀往々未知其所由來嘗以問樂圃  
先生先生出所為圖經續記以示我曰此一覽盡之矣退  
而觀之數千百載之廢興千數百里之風土燦然如指諸  
掌嗚呼何其備哉先生之書三卷若干條而所包括者古  
今圖籍不可勝數雜浮屠方士之書小說俚諺之言可以證  
古而傳久者亦畢取而並錄先生豈欲矜淹博而耀華藻

哉昔時牧守之賢異來者之相承也道前世人物之感奠  
後生之自力也溝瀆條浚水之方倉庾記裕民之術論風  
俗之習尚夸戶口之蕃息遂及于教化禮樂之大務於是  
見先生之志素在于天下也豈可徒以方域輿地之書視  
之哉先生未冠而擢第英聲振於士林二不幸以末疾卧  
家不得建其志於斯民然而潛心古道篤意著述其所揆  
次成秩如是書者非一竊嘗探測其淵源而妄論其規制  
以謂黃鍾大呂不足以比其清陽阿激楚不足以方其妙  
齊統蜀錦不足以埒其華崑玉南金不足以儼其美長江  
巨河不足以况其遠輕車駿馬不足以侔其逸意者左丘

非失明國語不成虞卿非窮困陽秋不作一何發揮之妍  
麗也不然天將激先生以鳴斯文是以固陋之耶雖然先  
生之疾損矣無害其可以高舉于天衢也昔者劉向非大  
發<sup>天</sup>祿石渠之藏不能盡論分野之風物賈耽非博詢遐陬  
絕域之衆不能悉知華夷之道里先生之才不歎于二子  
特處非其所而已與其陳四境之形勝孰若使志四海之  
封畿與其論千里之事物孰若綜萬方之利害况史觀經  
始品藻才難當筆削之任者非先生而誰可哉伏讀終篇  
感先生之未遇輒書卷末庶幾萬一有倣于朝廷今日當  
為官而擇人者元祐七年十二月朔大雲編戶林處序

圖經續記後序

祕書省正字樞密院編修朱公伯原嘗為前太守宴公作  
吳郡圖經續記三卷既成而宴公罷去遂藏于家其後太  
守章公雖求其本以真郡府而見之者尚鮮也元符改元  
安上以不才濫縮倅符到郡之後周覽城邑顧瞻山川竊  
欲究古興替盛衰之迹而舊經事簡文繁考證多闕方欲  
博訪舊聞稍加增綴而得此書於公之子耜讀之終卷惜  
其可傳而未傳也於是自不敢自秘僧以承乏郡事俾鏤板  
于公庫以示久遠若乃著述之本意則詳于自序而其摭  
錄之博瞻措意之深遠則又詳於常林二君之後序矣茲

不重見姑誌其刊鏤之歲月云越明年歲在庚辰八月望日朝請郎通判蘇州權管軍州事祝安上書

自唐辰八月權州祝君鏤板題跋之後距今紹興甲寅寔三十五年佑被命假守時兵火之餘圖籍散亡秉筆凝滯觸事面墻每賢士大夫相過必以諮訪未幾前湖州通判陳能千自青龍泛舟携此書相訪開卷欣躍因授學官孫衛補葺校勘復為成書以傳異日職方氏續修中興新書當亦有取於斯則樂圃先生之志不泯矣紹興四年六月初十日漣水孫佑書

